



# Wantok



Isu Namba 2331 Me 30 - Jun 5, 2019 28 pes

Niuspepa Bilong Yumi Ol PNG Stret!

K1 tasol

**THEODIST LTD TECHNOLOGY**

**FREE WIRELESS PRINTER WITH ANY LENOVO OR HP LAPTOP**

ONLY! **K1,299** CODE:HPCELCOMBO

ONLY! **K1,320** CODE:V130COMBO

WHILE STOCKS LAST, LIMIT 1 PER CUSTOMER  
TERMS & CONDITIONS APPLY SEE IN STORE

**GET THIS PRINTER FREE!**

All-in-One HP DeskJet 3720 Wireless Printer

WORTH **K154**

POM: 313 9800 / 7232 1300 / 321 5667 E-mail: sales@theodist.com.pg | LAE: 472 5488 / 7054 4494 / 472 7838 E-mail: saleslae@theodist.com.pg

# Nupela PM tude

## Husat bai kisim ples?



Patrick Pruaitch

James Marape

William Duma

Charles Abel

Lukim stori pes 3

Sir Puka go bek long PNC

Pes 2

Nupela praim minista kamap

Pes 3

# DOUBLE DATA

Lukim P7 lo kisim moa toksave!



4G LTE

**OCEAN BLUE** KraftHeinz GLOBAL QUALITY STANDARD

**WHITE TUNA FLAKES MAKE NO MISTAKES**

**BARBECUE** WHITE MEAT TUNA Barbecue Sauce

**SANDWICH** WHITE MEAT TUNA Sandwich Flakes

**HOT AND SPICY** WHITE MEAT TUNA Hot and Spicy

**SMOKED** WHITE MEAT TUNA Smoked Flavour



# Sir Puka go bek long PNC

**Benorah Carrie Hesehing i raitim**

MEMBA bilong Abau na pastaim Minista bilong Helt na HIV/AIDS, Sir Puka Temu i go bek long People's National Congress (PNC) Pati asde.

Em i mekim dispela senis bihain long Praim Minista Peter O'Neill i rait i go long Gavana Jeneral long lusim sia bilong Praim Minista.

Sir Puka i tok olsem em i wanpela man i bin sanap strong long putim Mista O'Neill olsem Praim Minista long yia 2011. Em yet i tokim O'Neill gen long bung bilong PNC Pati las mun long lusim sia bilong Praim Minista.

"Yu mas lusim sia bilong Praim Minista nau, bai mi stap yet wantaim yu long gavman. Sapos nogat, mi bai lusim yu," Sir Puka i tok.

Em i tok olsem Mista O'Neill i tok bin harim tok bilong em, na em wanpela as tasol em i lusim gavman na i go long Oposisen.

"Tude (asde), yu tokaut long



kantri olsem yu lusim sia bilong Praim Minista na mi amamas long yu.

"Olsem na nau bai mi go bek long ol ol arapela brata bilong mi,"

em i tok.

Sir Puka i mekim dispela tok na i kirap long palamen kibung na i wokabaut i go long sait bilong gavman.



## Sir Peter Lus i raun long palamen

Long taim palamen i bung long Tunde long dispela wik, planti manmeri i putim yau long wanem samting ol memba i mekim long plua bilong palamen. Planti moa tu i putim yau long redio na i lukim televisen brodkas. Sir Peter Lus, memba bilong Maprik bipo, na wanpela sevisman bilong palamen, i bin bilas gut tru na i spin raun insait long palamen long taim Wantok i bungim em. *Poto Nicky Bernard.*

## Ol memba amamas long disisen bilong O'Neill

**Paul Zuvani i raitim**

OL Memba bilong Palamen i amamas long toktok bilong Praim Minista Peter O'Neill olsem em i risain olsem praim minista.

Oposisen lida na Memba bilong Patrick Pruaitch, wantaim tim bilong em i no amamas long O'Neill long ol wik na de i go pinis na i redi long kamapim Vot i Nogat Bilip long rausim em tasol asde i tok O'Neill i lida tru.

"Maski ol hevi mipela i gat long em, poroman pasin namel long yu na mi bai go het," Pruaitch i tok.

"Politik em politik tasol pasin poroman bai stap yet.

"Mi givim yu rispek long disisen yu mekim na olsem mi no gat planti toktok. "Yu olsem nupela praim minista long nupela jeneresen bilong yumi i mekim kantri bilong yumi amamas bikos long planti gutpela senis.

Pruaitch i tok em i no lus tingting long wok bung bilong ol taim ol i bung long kamapim nupela gavman bihain long 2012 Jeneral Ilesken.

Memba bilong Tari Pori i tok disisen O'Neill i mekim i soim olsem em i trupela mani.



**Peter O'Neill i resain olsem praim minista aste.**

Em i tok dispela i soim olsem kain disisen i ken kamap.

Memba bilong Sentral Bogenvil, Sam Akoitai i tok em i amamas long wok i kamap long bungim Bogenvil Referendum.

Em i tok dispela wok i no inap kamap sapos O'Neill i no givim sapot bilong em na em i tok tenkyu i go long em na gavman bilong em pastaim.

Memba bilong Hagen William

Duma i tok maski em i lusim O'Neill em i stap gutpela poroman bilong O'Neill yet.

Long wankain taim Memba bilong Abau Dokta Puka Temu husat i tok em i lusim O'Neill bikos em i no risain.

Tasol nau em bai go bek na joinim O'Neill wantaim tim bilong em.

Sir Puka i tok olsem na long wankain taim i wokabaut stret i go long said bilong gavman.

## Spika i no laik lusim sia nating

**Benorah Carrie Hesehing i raitim**

OPOSISEN Lida, Patrick Pruaitch i askim palamen long senisim Spika bilong Palamen, Job Pomat. Tasol spika i askim ol long soim em mama lo na seksen we i givim ol rot bilong bihainim na rausim spika "Soim mi long mama lo na lo bilong dispela haus we i soim ol rot bilong bihainim na rausim spika.

"Long luksave bilong mi yet, i gat rot bilong makim Spika tasol na i no toktok long rausim spika.


"Sapos yumi mekim despela nau, mepela bai statim wanpela nupe-la samting we bai stap long stori

bilong palamen sampela taim bihain," Mista Pomat i tok.

Sedo Atoni Jeneral na Minista bilong Jastis, Kerenga Kua i tok;"Mi laik soim yu mama lo i tok long mekim kain senisim olsem na mi laik yu honarim dispela lo."

Mista Kua i tok seksen seksen 107, bilong mama loem i toktok long makim spika. Na long seksen 110, sabseksen 3 i tok senisim disisen bilong seksen 107.

Mista Pomat i no gat luksave wankain long lo olsem Mista Kua na i sanap strong long tingting bilong sekim kot long tok klia long as bilong dispela lo.



## Fly to Brisbane on the Big Bird!

- Our Boeing 767, the largest on the route
- Ex Pom 7x weekly
- Enjoy complimentary food & beverage service
- Enjoy inflight entertainment
- Free 30kgs baggage allowance
- Business class offer
- Our Melanesian hospitality never left Australia



**Air Niugini**  
www.airniugini.com.pg

For bookings call  
Toll Free on 180 3444  
7373 2100 / 7104 3444





# 2019 Sir Anthony Siaguru Walk Against Corruption

Theme: "Justice = Enforcement + Reporting"

PORT MORESBY SUNDAY 09TH

JUNE 2019 6AM - 9AM

OTHER CENTERS: LAE

GOROKA

Corporate team of 12 - K2,000

Civil Society & Church team of 10 - K200

School team of 10 students and 2 teachers - K200

Family team of 10 - K100

Prizes will be awarded to the best dressed team and the team with the most creative anti-corruption message



Register a team today!

call: 323 4917 / 7517 email: info@transparencypng.org.pg location: Lokua Avenue Section 54 Lot 31, Boroko NCD

## Ol Praim Minista bilong Papua Niugini

# Nupela praim minista kamap

Paul Zuvani i raitim

Gavman aninit long Peter O'Neill bai stap yet o nogat?

Oposisen bai kamapim nupela gavman?

TUDE Papua Niugini bai save sapos em bai gat nupela praim minista o nogat.

Dispela em taim ol toktok bilong dispela tok i kamap na ol memba i vot long em long palamen kibung.

Palamen bai bung long dispela moning na votim dispela nupela praim minista.

Nau yet yumi I nogat save sapos wanpela memba bilong Pipels Nesanel Kongres (PNC) bai kamap praim minista o memba bilong ol arapela kolisen pati bai kisim dispela sia.

Ol kendidet husat inap kamap praim minista em Oposisen lida na Memba bilong Aitape Lume,

Patrick Pruaitch; bipo Minista bilong Fainens na Memba bilong Tari Pori, James Marape; Minista bilong Pablik Entaprais na Memba bilong Hagen, William Duma; na Deputi Praim Minista na Minista bilong Treseri, Charles Abel.

Nau yet Oposisen i gat 66 memba na Gavman i gat 44.

Vot bilong kamapim nupela praim minista i kamap bihain long Praim Minista Peter O'Neill i risain asde moning.

O'Neill i givim pas bilong risain long 9.45 moning long opis bilong Gavana Jeneral, Sir Bob Dadae.

Spika Job Pomat i tokaut long palamen kibung long asde long 10 klok olsem em i kisim pinis bekim bilong Sir Bob long pas bilong O'Neill.

Tingting bilong Oposisen long kamapim vot i Nogat Bilip bai i no inap kamap.

Tasol pastaim long dispela Spika

i tokaut olsem long 10.45 moning Opis bilong em i kisim toksave bilong vot i Nogat Bilip long O'Neill.

Dispela i mekim Oposisen i ting vot bilong ol bai go het yet long taim ol i no save olsem O'Neill i givim pinis pas bilong risain olsem praim minista.

Praim Minista em i sori olsem em i mas risain tasol em i mas mekim olsem long bihainim laik bilong ol pipel bilong Papua Niugini.

"Mi save olsem Oposisen i redi long kamapim vot i Nogat Bilip we ol i gat namba (MP) na i bel isi long kamapim vot," O'Neill i tok.

"Tasol nau long moning mi salim pas i go long Gavana Jeneral Sir Robert Dadae long toksave long em olsem mi risain olsem praim minista.

"Wanpela samting i pas long lewa bilong taim mi tokaut long dispela disisen em olsem gavman bilong mi inap long givim fri

edukesen long planti milien pikinini.

"Moa long dispela em ol pikinini meri.

"Mipela i surikim yunivesel helt kea long ol manmeri bilong mipela, fri helt kea we dispela i helpim gut ol ruel manmeri bilong mipela.

"Mipela i kamapim infrastraksa long kamapim na stretim ol rot, bris na ples balus long ol manmeri i ken kisim gut sevis."

O'Neill i tok em i amamas tu long taim bilong em we i lukim kantri i holim Esia Pasifik Ikonmik Kopresen (APEC) kibung we wanpela bikpela agrimen i kamap em long bringim pawa i go long planti hap bilong kantri long 2030.

Em i tok em i gutpela olsem em i mekim dispela disisen olsem kantri i ken go het.

Ol arapela Memba bilong Palamen tu i bekim toktok bilong disisen bilong O'Neill.

**Sir Michael Somare** (Pangu Pati) – 16 Septemba 1975 inap 11 Mas 1980.

**Sir Julius Chan** (Pipels Progress Pati) – 11 Mas 1980 inap 2 Ogas 1982.

**Sir Michael Somare** (Pangu Pati) – 2 Ogas 1982 inap 21 Novemba 1985.

**Paia Wingti** (Pipels Demokretik Muvmen) – 21 Novemba 1985 inap 4 Julai 1988.

**Sir Rabbie Namaliu** (Pangu Pati) – 4 Julai 1988 inap 17 Julai 1992.

**Paia Wingti** (Pipels Demokretik Muvmen) – 17 Julai 1992 inap 30 Ogas 1994.

**Sir Julius Chan** (Pipels Progres Pati) – 30 Ogas 1994 inap 27 Mas 1997.

**John Giheno** (Pipels Progres Pati) – 27 Mas 1997 inap 2 Jun 1997.

**Sir Julius Chan** (Pipels Progres Pati) – 2 Jun 1997 inap 22 Julai 1997.

**Bill Skate** (Pipels Nesanel Kongres) 22 Julai 1997 inap 14 Julai 1999.

**Sir Mekere Morauta** (Pipels Demokretik Muvmen) – 14 Julai 1999 inap 5 Ogas 2002.

**Sir Michael Somare** (Nesanel Alaiens) - 5 Ogas 2002 inap 2 Ogas 2011.


**Sam Abal** (Nesanel Alaiens) – 13 Desemba 2010 inap 17 Janueri 2011 na 4 Epril 2011 inap 2 Ogas 2011.

**Peter O'Neill** (Pipels Nesanel Kongres) – 2 Ogas 2011 inap nau 29 Me 2019.



## Spika bosim kibung

Long taim palamen i bung long Tunde apinun, Spika Job Pomat i bin bungim planti strongpela salens tru long ol memba bilong Oposisen. Ol i bin traim long rausim em long sia bilong Spika tasol em i strong na i no larim ol i mekim dispela. Tude long taim palamen i bung, bai ol memba i makim nupela praim minista. Peter O'Neill i risain long dispela wok asde. *Poto Nicky Bernard.*



## TERM DEPOSIT

- ✓ Lock away excess funds - K5,000 - K250,000
- ✓ Protect your savings from impulsive spending
- ✓ Earn interest and reinvest

WE ARE **BSP**

320 1212 / 7030 1212 - 24/7 servicebsp@bsp.com.pg www.bsp.com.pg





# Papagraun laikim ripot bilong K15.5m Manumanu graun

## Stanley Nondol i raitim

PAPAGRAUN bilong Manumanu graun i laikim nupela gavman i mas kwiktaim kirapim gen wok painim bilong Manumanu graun we gavman i bin baim long K15.4 milien bilong Papua Niugini Difens Fos tasol taitel i no kam aut na wok developmen i no kamap yet.

Papagraun i tok ol i gat bikpela wari long O'Neill gavman i no bin hariap long mekim wok painim long rot gavman i baim K15.4 milien long kisim graun bilong ol long Manumanu ausait long Pot Mosbi siti.

Papagraun i tok dipatmen bilong Difens i kisim graun bilong ol long pasin korapsen bikos opis bilong Veluia Jeneral i soim olsem trupela veliu bilong graun em K9 milien tasol gavman i baim K15.4 milien.

Ol i laikim wok painim i mas kamap long soim husait tru i kisim K6.4 milien.

Gavman i baim K15.4 milien long graun posen namba 698, folio 2392 long mun Ogas 2014 tasol Dipat-

men bilong Lens na fisikel Plening i no givim taitel bilong graun go long Dipatmen bilong Difens long wokim developmen.

Ripot bilong Veluia Jenerel i soim olsem tru veliu bilong gran em K9 milien tasol gavman i baim long K15.4 milien 6-pela yia i go pinis.

Taitel bilong graun i no kam aut yet long Lens dipatmen na long dispela as bikpela toktok i kamap olsem gavman i baim moa long veliu bilong graun na em i korapsen.

Taim dispela toktok i kamap bikpela long palamen, Lens Minista Justin Tkatchenko i tok taitel bilong dispela graun wantaim ol fail i lus insait long opis bilong Lens Dipatmen.

Mista Tkatchenko i bin tokaut olsem wok painim i kamap long dispela korap pasin bilong kisim graun tasol tripela yia i go pinis na no gat wanpela ripot i kam aut yet long dispela korap pasin.

Olsem na ol papagraun i tok ol i gat bilip long nupela gavman bai harim wari bilong ol pipel na kirapim wok

painim long dispela graun na lo i mas mekim save long husat i go pas long pasin korapsen na paulim bikpela milien kina long nem bilong graun bilong ol.

Gavman i baim dispela graun long putim Difens Long Rens Yunit long hap long putim sekyuriti was long taim bilong APEC miting long Mosbi tasol dispela i no kamap yet na APEC miting i pinis.

Dispela Manumanu graun i stap long 7 na 8-Mail na go klostu long 9-Mail na Bomana na Laloki long Sentral provins.

Ekting Seketeri bilong Difens, Trevor Meauri i bin tok olsem dipatmen bai mekim wok bilong em long dispela korapsen na wok painiam bai kamap hariap long painim aut husat tru i bin go pas long kisim K6.4 milien long nem bilong baim Manumanu graun.

Mista Meauri i tok sapos wok painim i kamap ples klia, bai husat i kisim mani bilong gavman long pasin korapsen i ken bekim mani o kisim mekim save bilong lo.

## Iukluk bek long wik

### O'Neill putim narapela askim long Suprim Kot

Praim Minista Peter O'Neill i putim narapela eplikesen gen long Suprim Kot long tok klia long dispela Fot I Nogat Bilip em Oposisen i bin putim tupela wik i go pinis. Em i tok Oposisen i bin putim mosen na bihain em i rausim na dispela i mekim olgeta lain i paul, olsem na em i laik Suprim Kot i mas tok klia long ol seksen bilong Konstitusen.

### India i amamas long kam long PNG

India i amamas long kam long PNG long stap insait long bung bilong India-Pasifik Ailan Lidas Samit. Dispela bung bilong ol bai kamap long Pot Mosbi. Presiden bilong India, Shri Ram Nath Kovind i tok olsem long taim em i bungim Hai Komisina bilong PNG long India, Paulias Kornilong las wik.

### Kot i tok orait long VoNC mosen

Suprim Kot i bin tokaut long Fonde olsem Oposisen i ken go het long putim mosen bilong Fot I Nogat Bilip (VoNC) long Praim Minista. Kot i bin givim dispela bekim bihain long ol i skelim eplikesen bilong Minista bilong Jastis Alfred Manase long stopim dispela mosen bilong VoNC i go het.

### Gavman tokaut long tripela nupela jas

Judisal na Ligal Sevis Komisina i tokaut long tripela nupela jas bilong Suprim na Nesenel Kot. Ol i makim Jastis Ere Kariko i go bek long wok bilong em olsem jas bilong Nesenel na Suprim Kot long narapela tenpela yia moa. Jastis David Cannings bai holim wok bilong jas bilong Nesenel na Suprim Kot long narapela tripela yia moa. Ol i makim Jastis John Richie Bernard Kaumi olsem Ekting Jas bilong Nesenel na Suprim Kot long narapela 12-pela moa mun.

### Eda Ranu putim wara go bek ong Laloki Haus sik

Gavman i givim K1milien long Eda Ranu long konektim seif klin wara i go bek long Laloki Saikarik Haus sik long Sentral Provins. Helt Minista Elias Kapavore i givim dispela mani i go long Eda Ranu na wok bilong konektim wara bai stat nau. Dispela haus sik i no bin gat klinpela seif wara inap 19 yia olgeta. Haus sik i save kisim graun wara long mekim wok bilong haus sik tasol wara i no seif na ol i pasim haus sik na salim olgeta sikman na meri i go bek long famili bilong ol.

### Kot i holim bek man husat kilim famili

Mt Hagen Distrik Kot i holim bek man husat i kilim famili bilong em inap ol polis i pinisim ol wok painim aut. Christopher Johnson Kamo, 39 krismas, bilong ples Kambaramba long Angoram Distrik, Is Sepik, i kamap long ai bilong Mejistret Betty Jacob long Mt Hagen Distrik Kot. Mejistret Jacob i tokim em olsem dispela sas bilong em i bikpela tru na kot i no gat pawa long givim beil long em. Bai Kamo i kamap gen long kot long Jun 26. Ol polis i tok Kamo long kilim meri bilong em Silingu Lamu na tupela pikinini bilong em Irene Narakau 8, na Genelyn Narakau 6 wantaim bebi sita bilong ol, Maggie Geyocmata 20 krismas, long Kim viles ausait long Mt Hagen long Me 6, 2019.

### Viles kot opisa i mas rejista

Ol viles kot opisa i mas rejista. Sapos ol i no rejista bai disisen bilong ol i inap sanap long ai bilong kot. Mejistret bilong Mt Hagen Distrik Kot, Lydia Karre i tok olgeta olgeta viles kot opis i mas rejista na kisim rejistresen namba bilong ol na ID kad. Em i tok ol viles kot opisa i save harim kot na mekim ol disisen long laip bilong ol pipel olsem na ol i mas rejista pastaim long ol i harim kot.

## Bogia DDA givim K200,000 long NID projek

### Benorah Carrie Hesehing i raitim

BOGIA Distrik Developmen Atoriti (DDA) i makim K200,000 baset aninit long Distrik Sevis Imprumen Program mani long skruim NID projek long distrik.

Memba bilong Bogia, Robert Naguri i makim DDA long sainim wanpela MOU agrimen wantaim Rejistra Jenerel bilong PNG NID projek, Noel Mobiha long Pot Mosbi, las wik.

Mista Naguri i tok Bogia em wanpela bilong ol distrik long kantri we ol pipel i save painim hat tumas long go kam long kisim ol sevis bilong gavman. Em i laik sanapim wanpela opis bilong NID long distrik hetkwa-ta long mekim isi long ol pipel long rejista na tu helpim gavman long Nesenel NID projek.

Distrik i makim K200,000 long dispela projek. Samting olsem K150,000 em bilong baim ol kompyuta na ol arapela samting bilong yusim long rejistaim ol manmeri na narapela K50,000 em bilong kisim sola pawa long givim pawa long sistem.

"Rejistra Jenereal bilong PNG NID projek, Noel Mobiha i tokim



Robert Naguri na Noel Mobiha i sainim agrimen. Foto: Benorah Carrie Hesehing

mipela olsem projek em yet bai kisim K150,000 na mipela yet i putim narapela K50,000 long kisim sola pawa.

"Bogia i no gat pawa saplai long dispela taim na dispela sola bai givim pawa long sistem bilong rejistaim olgeta pipel," em i tok.

Mista Naguri i tok DDA nau i wetim PNG NID projek long givim wanpela sas pepa bilong baim, bai

distrik i baim na ol i go het long NID projek long distrik.

Mista Mobiha i tok raun bilong ol opisa long PNG NID na em yet long i go long lukim Bogia distrik i no inap kamap hariap inap ol i kisim gutplea tok save long Minista. Olgeta wok i stop long dispela taim bikos kain kain senis i wok long kamap long ol minista na gavman long dispela taim.



# Aiome haikul i nidim helpim bilong pablik

Aiome Haikul long Madang provins i sot tru long kaikai long givim ol studen. Ol i gat inap kaikai bilong tripela de tasol. Bihain long dispela, bai ol i pasim skul na salim ol pikinini i go kam long ples bilong ol.

Sapos dispela skul i pas, bai ol gret 10 studen i kisim taim bikos ol i gat eksam long neks wik na ol gret 9 studen tu bai kisim taim.

Het Tisa bilong skul, Francis Kumo, Siaman bilong Skul Bod, Fr Peter Hunter na Deputi Bod Siaman Duncan Seko i salim pas i go aut long ol pablik long helpim dispela skul.

Pas bilong ol i tok, long nau yet skul i nidim K5,000 long helpim ol studen i stap yet long skul. Skul i no kisim yet TFF subsidi bilong en yet long dispela tem.

Memba bilong Madang bipo, Sir Peter Barter i tok em bai helpim Aiome Haikul long K5000, tasol Gavman i mas mekim wok bilong en na helpim skul.

Sir Peter i tok wanpela rot bilong karim ol saplai i go long skul em long yusim ol moto kanu long Jant Bris i go long Aiome. Em i tok bai ol i toktok tu long Ramu NiCo long givim han na karim ol saplai i go long bris.

Ol i tok dispela Tuisen Fri Fi bilong nesenel gavman i no karamapim kost bilong transpot olsem na ol i save strong long Ramu Distrik Developmen Atoriti (DDA) long Gavman Sios Patnasip mani na sampela helpim mani i kam long provinsal gavman. Tasol ol i no kisim dispela helpim mani inap nau.

Dispela K72,000 ol i kisim em i liklik hap mani tasol bilong TFF. Ol i yusim dispela mani long baim kost bilong bot, trak na ol man i mekim wok. Ol i yusim dispela mani tu long baim kaikai bilong ol studen i stap long skul.

Holi Trinita Engliken sios i save helpim dispela skul long mani, tasol nau sios i no gat moa mani long helpim Aiome Haikul.

# Tupela elementeri skul long Sentral i kisim e-laibreri

Ol pikinini long tupela skul long Sentral provins i wok long ritim ol buk nau bihain long ol i kisim ol tablet kompiuta.

Ol i kisim ol dispela tablet long program bilong PNG-Australia Partnership. Ol dispela tupela elementeri skul i kisim 40 tablet aninit long Together for Education (T4E) projek.

Ol dispela tablet i gat 250 e-book em ol Papua Niugini manmeri yet i bin raitim.

T4E projek em i kamap long strongim pasin bilong rit na kaunim ol namba long ol elementeri skul. Na long Sentral provins, Child Fund i go pas long lukautim dispela program.

Ol dispela stori i soim ol piksa na kalsa bilong laip long PNG em ol pikinini i ken luksave long en.

Kairuku Distrik Edukesen Kodineta, Priscilla Pyakalua i tok klia long yusim ol nupela rot bilong lainim ol liklik pikinini.



Em i tok, "Mipela i wok long teknoloji bai kirapim tingting bitraim ol nupela rot bilong givim save long ol pikinini. Na dispela e-laibreri we i yusim nupela

long ol pikinini long lainim long ritim ol buk. Mipela i amamas long ol pikinini long ol elementeri skul long rural eria i kisim dispela sapot." Ol tisa bilong dispela tupela askul tu i wok long kisim tren-

ing long pasin bilong yusim gut ol dispela tablet long redim ol lesen bilong ol na glasim wei ol pikinini i yusim ol tablet.

Misis Pyakalua i tok ol dispela tablet bai helpim tu ol pikinini bikos nau ol i sot long ol tisa na ol material bilong skulim ol pikinini.

Ekting Kaunsila-Edukesen bilong Australia Hai Komisn, Janelle Denton i tok Australia i amamas long sapotim dispela kain rot bilong helpim ol pikinini long rit na rait gut long skul.

Long ol 247 elementeri skul long Sentral provins, bai 20 pesen i stap long dispela program na ol dispela skul i stap long ol rurel eria.

Tupela elementeri skul long Madang na narapela tupela long Morobe provins i kisim pinis ol dispela tablet wantaim ol e-buk. World Vision i lukautim dispela program long Madang na Morobe provins.

# SDA sapotim Goroka Jeneral Haus sik

Sape Metta i raitim

PABLIK Praivet Patnasip (PPP) program em i wok gut nau long bringim ol NGO, sios grup, ol bisnis ogenaiesen na ol manmeri husat i save i gat dispela tingting long helpim ol wok bung long bringim ol sevis i go daun long ol pipel.

Wanpela sios grup long Goroka, Isten Hailans i luksave long dispela patnasip program we i kirapim bel bilong ol sios lida manmeri long putim dispela program i go long

wok. Venopauka Seven De Edventis (SDA) sios i bungim na kamapim sampela mani inap long moa long K2000. Na mak ol sios lida i baim sampela ol bedsit, pilo, mop, jag na fraing pen, rais kuka na ol liklik plet bilong skelim ol sup na kaikai long en na givim i go long TB wot long Goroka Provinsal haus sik.

Opisa bilong sios Joshua Soso i tok dispela program em i gutpela, long wanem, em

i opim nau rot bilong ol sios long kamap na wok bung wantaim helt sekta long bringim dispela kain ol samtin i go na helpim ol sik manmeri na pikinini husat i slip na kirap long haus sik.

"Mipela i amamas long kamap patna na helpim ol sik manmeri na pikinini husat i laikim wok stretim long kamap long TB wot," Soso i tok.

Sif Eksekutiv Opisa (CEO) bilong Isten Hailans Provinsal Helt Atoriti (EHPHA) Dokta Joseph Apa i tok, "Long wok

bung wantaim ol sios na ol arapela ogenaiesen em i rot bilong go long helpim ol pipel bilong yumi husat bai i sot tru long helpim."

Em i tok dispela em i no namba wan taim long ol sios grup long kamap na givim kain helpim na sapot.

Dokta Apa i tok amamas long Venopauka SDA sios long luksave long dispela laik bilong ol sik manmeri na pikinini long TB wot na bringim dispela ol samting i kam long helpim ol.

# Ol studen i skelim ol lida

Ol sikispela studen bilong La Salle Teknikel Koles long NCD, i bin stap insait long Chat Room redio sesen long NBC long Trinde 22 Me na autim tingting bilong ol long wanem as bilong dispela tok, lida, na wanem kain man o meri em i trupela lida.

Ol i toktok long kwaliti bilong lida, ol lida bilong ples na ol lida bilong tude, ol lida long baibel na ol wok bilong ol lida.

Ol i autim tingting bilong ol tu long wanem kain lida ol i laik lukim long kantri.

Gemilda Lomonga, wanpela gret 9 studen, i tok lida i mas gat strongpela tingting long kamapim gutpela senis long ol pipel. "Olgeta pipel i gat rait long kamap lida, na i no ken lukluk tasol long kamap namba wan. Lida i mas mekim gutpela wok bilong helpim olgeta pipel."

Evelynne Hau, wanpela gret 9 studen, i tok lida i mas stretim na

mekim ol wok gut. "Ek-sampel, lidasip i kamap we mipela i gat prinsipal, deputi prinsipal, het tisa, ol het boi na het gel i go daun long ol klas kepten. Wan wan bilong ol dispela lain i mekim wok bilong ol long ranim gut skul bilong mipela."

Roselyn Laemeta, wanpela gret 10 studen i toktok long wanem ol samting i kamapim ol gutpela lida. "Dispela man o meri i mas mekim ol gutpela disisen, em i mas wok oltaim, em i mas luksave na harim wari bilong ol arapela. Em i no ken pret long ol toktok ol arapela i mekim egensim em, bikos ol dispela samting i helpim olgeta."

Anthea Seka, wanpela gret 10 studen i tok, "Pasin bilong lida long taim bilong ol tumbuna i no wankain olsem tude. Lida bilong tude i winim bikpela skul, i gat mani na koneksen. Olsem na PNG i nidim transperensi, gutpela gavanens na ol stretpela lida."



Isten Hailans Provins Helt Atoriti Sif Eksekutiv Opisa, Dokta Joseph Apa (lep) i sekhan opisa long Venopauka SDA sios Joshua Soso long strongim wok bilong Pablik Praivet Patnasip (PPP) program long Goroka, Isten Hailans. Foto: Sape Metta

**PNG Phones Against Corruption**  
SMS 16321  
It's FREE  
It's ANONYMOUS

An Initiative of GoPNG and UNDP supported by the UNDP-Australian Government Asia Pacific partnership on Anti-Corruption for Peaceful and Inclusive Societies.

# PHONES AGAINST CORRUPTION

Combating corruption is everyone's business

Report corruption by texting Digicel# 16321

Do not let corruption stop the development of Papua New Guinea

Department of Finance Internal Audit & Compliance Division  
Phone: 79986000 Extension: 8206  
www.phonesagainstcorruption.org

Say "NO" to Corruption!

Text 16321

- > Simple
- > Free SMS
- > Anonymous



# Morobe ELC tok gutbai long pasto

Dispela pasto Henry Gende we i bin wok pasto long Gurako na Bundun long 8-pela yia olgeta inap long taim bilong em i pinis.

Ol peris manmeri long Gurako, Bundun na Mumeng Lutheran sios manmeri i kamap long tok gutbai long em tu.

Pastor Anonga Giob bilong Gurako Lutheran Peris i autim tok bilong God na salensim ol manmeri long sanap strong long bilip bilong ol.

Em i tok yumi mas wok

strong long bilong yumi long Kraus husat i dai long kisim bek yumi.

"God em i God bilong bipo, nau na olgeta taim na i lukim olgeta samting yumi i mekim," Pasto Giob i tok.

"Em i tok maski gutpela taim o taim nogut, yumi mas strong long bilip em yumi kisim long skul long en long sios.

"Yumi i spesel long ai bilong God na olsem yumi mas bihainim tok bilong em olgeta taim."

Em i tok ol wok manmeri

i skulim yumi long tok na i soim yumi pasin bilong harim na bihainim tok.

Em i givim piksa long Pasto Henry olsem wanpela bilong ol lain husat ol bilip manmeri i mas bihainim lek mak bilong ol.

Pasto Henry bipo i bin wok long ELC Ukata long Niugini Ailan na bihain i go long Bunbun long Morobe provins.


Em i givim sevis long mekim wok bilong Bikipela inap long las wik em i ritai long wok pasto.

Pasto Henry i lukluk

long pas Paul i raitim i go long Kolosi 3:1 long serim tok bilong God.

Em i tok, "God i kirapim yupela pinis wantaim Kraus, olsem na yupela i mas wok long kisim ol samting bilong antap we Kraus sindaun long sia king bilong en long han sut bilong God."

Em i tok tenkyu long sapot ol i givim em na i tok ol i no ken wari long em i pinis long wok tasol i mas sanap strong na skruim ol tok na pasin ol i lainim pinis.



Pasto Henry Gende bilong Ivanjelikal Lutheran Sios.



## Yut, Meri na Famili

Pastor Barbara Lunge

### Dijital ikonomi na no gat pepa mani sosaiti

**W**AN wol gavman i wok long redim ol samting bilong kamapim sosaiti we i no gat pepa mani taim 2020 i kam. Dispela gavman nau i wok long lukautim ol wok bilong ikonomi, politik, sosel na relijon long wol.

Ol baibel rit long daunbilo i tokaut long lida bilong dispela wan wol gavman na ol giaman profet bilong en.

Buk bilong Kamapim Tok Hait 13: 1, 11 (KJV)

1 Na mi lukim wanpela wel enimal i kamap long solwara. Em i gat 7-pela het na 10-pela kom i kamap long ol het bilong en. Na 10-pela hat olsem ol hat bilong king i stap long ol kom bilong en. Long ol het bilong en ol nem i stap, na as bilong ol dispela nem em ol kain kain pasin bilong tok bilas long God.

11 Orait mi lukim narapela wel enimal i kirap insait long graun na i kam antap. Long het bilong en tupela kom i kamap olem ol kom bilong pikinini sipsip, na toktok bilong en em i olsem toktok bilong wanpela bikipela snek.

Bilong wanem ol i wok long kamapim sosaiti i no gat pepa mani long em? Dispela i min yu no inap long baim na salim ol samting wantaim pepa mani na siling olsem kina na toea tasol bai yusim kad tasol. Bihain long dispela ol bai putim ol maikro sip (ain samting) long sampela hap bilong bodi bilong yu olsem han o poret.

Yupela i mas was long larim ol i putim maikro sip i go long han o poret bilong yupela olsem yupela i no ken brukim tok bilong God.

Buk bilong Kamapim Tok Hait 13: 16-18 (KJV)

16 Orait namba tu wel enimal i tok na ol i putim wanpela mak long han sut na long pes bilong olgeta manmeri, maski ol i manmeri nating.

17 Na sapos man i no gat dispela mak bilong nem bilong wel animal o sapos em i no gat namba bilong nem bilong en, orait em i no inap long baim samting long em.

18 Man i gat gutpela tingting, em inap save gut long dispela samting. Man i gat save, em i mas kaunim gut namba bilong wel enimal. Dispela namba em i namba bilong wanpela man, na namba bilong dispela man em 666.\*

Bihain long ol i yusim kad long sampela taim, ol bai putim maikro sip long han bilong yu. Maikrosip i olsem wanpela liklik sid bilong rais. Dispela pasin ol i mekim long yu, em i gutpela long ol tasol long yu yet, dispela i nogut. Dispela i min olgeta praivet samting bilong yu olsem ripot bilong mani em olgeta bai putim long dispela maikrosip na bai putim long han bilong yu o poret bilong yu.

Long dispela maikrosip, bai dispela wan wol gavman bai skelim ol wokabout bilong yu long Setalait sistem. Long taim dispela i stap, yu bai kamap wanpela samting bilong ol na ol bai bosim yu.

Buk bilong Kamapim Tok Hait: 14:9-11 (KJV)

9 Na narapela ensel i bihainim dispela tupela ensel na i kam. Dispela namba 3 ensel em singaut strong olsem, "Sapos wanpela man i lotu long dispela wel animal na long piksa bilong en, na em i kisim mak long pes bilong en na han bilong en, orait bai em i mas dringim wanpela kain wain. 10 Dispela wain em belhat bilong God na God bai i no inap long tanim wara wantaim dispela wain pastaim. Na long ai bilong ol ensel bilong God, na long ai bilong Pikinini Sipsip, dispela man bai i kisim pen nogut long paia na long ston salfa i paia.

11 Na smok i kamap long dispela paia i givim pen long ol, em bai i go antap oltaim oltaim. Ol dispela man i save lotu long wel enimal na long piksa bilong en, na i kisim mak bilong nem bilong en, ol bai i no kisim malolo long san long long nait.

Buk bilong Kamapim Tok Hait: 16: 2 (KJV) Na namba wan ensel i go kapsaitim dis bilong en antap long graun. Na ol kain kain strongpela sua nogut tru i kamap long skin bilong ol man i gat mak bilong wel animal na i save lotu long piksa bilong en.

## Tripela man mekim tok promis long kamap Saesian bruda

TRIPLELA kendidet husat i stap novis bilong Salesian oda bilong Katolik Sios nau i tok promis long Pot Mosbi long las wik Fraide.

Dispela tripela bruda em Anthony Wale, Paul Paiara na Thomas Bwagaro. Olgeta i bilong Solomon Ailan.

Famili bilong ol wantaim ol gutpela poroman na komyuniti i kamap long lukim ol i mekim tok promis ol i kisim.

Ol nau bai kisim temporeri o hap taim promis long tripela yia we bihain long dispela ol bai kisim bikipela tok promis long stap oltaim olsem Salesian bruda na stap misineri.

Wale i tok dispela tingting bilong kamap wokman bilong Bikipela i stap long-taim long bel bilong em taim em i liklik mangi.

Em i save lukim ol Salesian bruda na wok ol i mekim na em i ting em i

mas kamap wanpela bilong dispela ol bruda.

Em i tok promis em i mekim i wanpela hap mak em i inapim dispela driman bilong em.

"Long stap novis, mi lainim planti samting long mi yet, long Don Bosco (Salensian bruda founda) na long God," Wale i tok.

"Long kisim dispela tok promis, mi save dispela wanpela hap mak mi kamap long em na long bilip na laip God i singautim mi long em.

"Mi inap kamap long dispela mak bikos long laik na strong God i givim long mi.

"Mi tok tenkyu long God long givim mi dispela grasia long stap strong.

"Wantaim strong bilong God, mi inap long soim laik bilong em i go long ol manmeri.

"Tingting bilong mi em long harim na skulim ol yangpela long tok bilong



Tripela kendidet, Anthony Wale, Paul Paiara na Thomas Bwagaro i kisim tok promis long kamap Salesian bruda.

God.

"Dispela i wanpela as mi laik bihainim Don Bosco na stap wokman bilong Jisas husat i sevia na Lord bilong mi."

Paiara i tok tingting bilong em i bilong skruim dri-

man bilong em olsem olmisin wokman.

"Mi laik strongim dispela gutpela bilip na poroman em Don Bosco i gat long Jisas na Maria."

Bwagaaro i tok em i laik wok wantaim ol yangpela.

"Mi laik wok wantaim olgeta manmeri, moa long ol yangpela," em i tok.

"Mi laik soim laik bilong God long ol sapos ol gat nem o nogat na mekim ol i pilim God insait long laip bilong ol.

## Bung lotu sensim laip bilong komyuniti

Hoffman Gulgarye i raitim

OL 160 manmeri na yut long Epri komyuniti long Kudjip, Saut Wagi, Jiwaka provins i tanim bel na givim laip long Jisas.

Ol i mekim olsem long wanpela bikipela lotu bung i bin i kamap long 13 inap 18 Mei long Kuplang viles.

Gorethy Kaiye, wanpela yangpela akaunten meri bilong Kudjip, husat i wok wantaim Oil Search Ltd, i bin go pas long dispela lotu.

Mis Kaiye i tok ol i laik autim gutnius long ol pipel na senisim pasin bilong ol, na kamapim gutpela sindaun long famili na komyuniti.

"Man nogut i giamanim planti ol yangpela manmeri na ol i kisim ol spakwara na spakbrus na bagrapim gutpela laip bilong ol yet Papa God i givim na i gat gutpela plen long en.

"Ol i mekim kain kain pasin na i hat long lusim ol dispela pasin. Gutnius tasol inap long helpim mipela long lusim ol dispela pasin nogut na luksave long laik bilong



SKUL BILONG SAIN TOKTOK.

Tupela meri long (lephan) em Anna Thomas na Heidi Otowani i save mekim sain long han long ol maus pas, yiau pas pikinini i no save toktok. Tupela i bin sanap wantaim Lucia Rifu Agino PNG Deaf Asosiesen Vais Presiden long taim bilong opim Toktok buk bilong ol pikinini i no save toktok na harim samting. (Poto Jacklyn Kimala)

Papa daun olsem buk baibel i tok long en.

Reveren Thomas Kaiye, pasto bilong Kudjip s Nazarene Emmanuel Sios i tok olgeta pipel i mas soim pasin bilong Kraus long famili, komyuniti, distrik, provins na kantri bai olgeta wok bilong yumi i kamap gut tasol wantaim stia i kam long Papa God.

"Sapos bikipela, yumi tok yumi Kristen kantri, yumi mas soim Kristen pasin. Planti taim yumi stap olsem long pasin tudak.

"Man nogut i paulim tingting, toktok na pasin bilong yumi olsem na planti taim laip bilong yumi i bagarap.

"Korapsen i kamap bikipela tru, planti manmeri i stap rabis, lo na oda i bagarap, sik i kamap

gavman i no lukautim gut ol pipel. Dispela i soim olsem satan i bagarapim kantri bilong yumi pinis.

"Yumi mas larim Papa God i kam insait long laip bilong yumi long senisim yumi," Mista Kaiye i tok.

Em i singaut long ol lida long bihainim pasin Kristen na wokim wok stret long lukautim ol pipel.



# PNG Biomass bai daunim kost bilong pawa

PNG Biomass i lukluk nau long kamapim wanpela 11 MW sola fam long Markham Veli we em i mekim ol wok bilong en nau. Dispela sola fam bai helpim long katim daun kost bilong ilektrik pawa.

Michael Henson, Projek Dairekta bilong PNG Biomass, i bin tokaut long dispela plen bilong kampani long wanpela infomesen brekfes bilong Lae Chamber of Commerce long Mande.

"Dispela sola fam bai kamapim Markham Renewable Energy Park inap long kamapim 41 MW kepesiti na bai opim rot bilong kantri i yusim tu reniwabel eneji long taim yumi bungim yia 2050," Mista Henson i tok.

Mista Henson i tokim dispela brekfes bung bilong ol bisnis long Lae olsem, "Wok bilong ka-

mapim pawa long ol liklik ailan kantri em i dia tumas na i winim kost bilong pawa long ol bikpela kantri."

Em i toktok long ol salens ol liklik ailan kantri i save bungim long traim kamapim pawa we i no kost bikpela mani tumas.

Em i tok tu olsem Papua Niugini inap long soim rot bilong kamapim pawa we i no dia tumas.

Mista Henson i givim eksampel bilong wok em PNG Biomass i mekim nau long Markham Veli long kamapim reniwabel eneji. Em i tok PNG Biomass i mekim olgeta samting long traim bringim kost bilong kamapim pawa i kam daun. Tasol Mista Henson i tok tu olsem, PNG i ken traim long bringim prais bilong pawa i kam daun, tasol prais bilong pawa long ol kantri long Esia em i stap

daunbilu tru.

Em i tok, "Mipela i wok long traim kain kain rot bilong bringim prais bilong pawa i kam daun. Mipela i disainim gen pawa plent, kisim dinau mani, painim grent mani, na katim daun profit.

"Mipela inap long mekim olsem bikos sponsa bilong Projek, Oil Search i laik lukim klinpela pawa we i no kost bikpela mani tumas na bai helpim ol rurel ikonomi long gro-

Olsem na mi laik tok tenkyu long Oil Search na Peter Botten long dispela komitmen bilong ol long mekim dispela Projek i kamap tru, maski sapos planti salens i kamap. Sapos mipela i ken pinisim dispela Projek, bai em i kamapim faundesen bilong sastenabel developmen bilong Ramu Grid."

Mista Henson i tok klostu bai dispela i pinis nau.



Projek Dairekta bilong PNG Biomass, Michael Henson i toktok long brekfes bilong Lae Chamber of Commerce.

## Sentral mas gat haus sik bilong em yet: Sir Puka

Stanley Nondol i raitim

HELT Helt Minista bipo Sir Puka Temu i tok em bai wok strong long kirapim nupela provinsal haus sik bilong Sentral provins, bikos provins no gat haus sik bilong em yet.

Sir Puka i tok nupela gavman bai lukluk long bildim haussik bikos gavman bilong O'Neill i no bin mekim kamap kaikai tok promis long wokim bikpela haus sik bilong Sentral na dispela em i wanpela as Sir Puka i lusim O'Neill gavman.

Sir Puka i tok em bai kisim ministri bilong helt bek long nupela gavman long pinisim sampela bikpela projek bilong helt dipatment em bin wokim.

Na Sentral provins haus sik em wanpela projek bilong helt dipatmen nupela gavman bai sapatim wantaim ol risos long kirapim.

Sir Puka i tok Pot Moosbi haus sik em wanpela haus sik we i givims sevis long olgeta pipel long kantri wantaim Sentral na Galp provins.

Em i tok singaut long bildim haus sik bilong Sentral i lukim pastaim gavman i no bin harim na putim mani long kirapim.

Sir Puka i tok helt sevis long kantri em i bikpela samting bikos laip bilong ol manmeri na pikinini em i impoten.

Em i tok ol sik olsem, TB, Polio, HIV/AIDS na namba bilong ol mama i dai long taim bilong kisim bebi i antap long Pasifik

rison na long wol.

Em i tok gavman na developmen patna i mas wok strong long kantri i mas fri long ol dispela sik we i kilim dai planti pipel pinis.

Sir Puka i tok helt sekta i gat planti program we nupela gavman bai lukluk na wok moa yet long laip bilong ol pipel i no ken lus long ol kain kain sik we marasin inap long sevim.

Em i tok ol bikpela salens bilong helt we nupela gavman bai lukluk long en em putim inap mani long kisim ol medikel saplai na marasin bilong olgeta haus sik, helt senta na klinik long kantri. Em i tok sot bilong marasin em bin wanpela bikpela salens bikos gavman i no save putim mani hariap na i lukim bikpela hevi i save kamap long ol rurel helt sevis.

Narapela program Sir Puka i laikim em gavman i kamapim stended program long helt sevis bai ran bikos nau yet i no gat stended o rit we soim klia wanem program gavman i ranim long stretim ol kain kain sik.

Sir Puka i tok moa olsem rifom program bilong appredim Provinsal haus sik i go long Provinsal Helt Atoriti i ran gut na bai go het we i gat tripela haus sik tasol long kamap PHA.

Em i tok em statim planti gutpela helt program bilong kantri na bai go het long pinisim ol wok aninit long nupela gavman.

# DOUBLE DATA

Sabskrab lo wanpela **bmobile** data plan tete, na kisim **DOUBLE DATA FREE!**

...inap long **15GBs** lo **FREE** bonus data!

Hariap, displa double data ofa bai stap inap long liklik taim tasol!

76003555/1555 or for 4GLTE call 1500

connect@bmobile.com.pg

facebook.com/Bmobile4GLTE

www.bmobile.com.pg

4G LTE



# Yabob ples pre na kamapim bel isi

James G. Kila i raitim

WANPELA spesel seremoni i bin kamap long ples Yabob, Madang long Sande Me 19, 2019 we ol komyuniti i lotu na i pinisim bel kros namel long ol yet.

Dispela restoren seremoni i bin kamap bihainim laik na tingting bilong ol pipel yet.

Pastor Japhet Imai bilong Abraham Sid Ministri i tok dispela tingting i bihainim stia tok na marimari bilong Papa God.

Seremoni i bin kamap long llopanek Luteran Sios graun long Tatakorek hauslain long Yabob viles.

Restoresen i kamap long mekim ol pipel i wokabaut fri o kamaut long banis bilong bel-nogut o wanpela strongpela kros toktok (curse) em wanpela lapun papa i mekim long bipo. Dispela papa em i save go pas long wok blong Kristen lotu, gavman na viles lida. Ol pipel i lukim em olsem wanpela profet insait long Yabob na Bel tokples komyuniti.

Nem bilong dispela lapun husat i dai pinis em Sapur Nian.

Insait long dispela restoren seremoni, komyuniti i makim wan wan klen na tok sori i go long ol pikinni bilong dispela lapun Nian.

Pikinini man bilong Sapur yet em Logan Sapur wantaim narapela brata Kassa Sapur i bin stap makim papa bilong ol long kisim tok sori bilong ol pipel.

Yabob viles i stap klostu long Madang taun, na em i kamapim sampela ol gutpela musik lain olsem Kales, Demas Saul, Willie Tropu na Offbeats. Tasol developmen long komyuniti i no bikpela long sait long sosel na ikonmik developmen.

Logan i bin givim tok stori long NBC Redio Madang long dispela seremoni, na i tok olsem papa bilong em Sapur em wanpela lidaman long ples Yabob, na insait long dispela lidasip bilong em i wok olsem pasto. Taim em i wok misin long autim tok bilong God olgeta lain i lukim em olsem wanpela profet insait long Bel na Yabob komyuniti.

Long taim bipo taim Sapur i wok long mekm wok misin ol manmeri i no harim ol tok bilong Papa God na Jisas Krais.

Logan i stori olsem taim ol pipel i no harim tok bilong Pasto Sapur em i bel-nogut long dispela na em i toktok na bagarapim ples wantaim kes (curse).

"Dispela bel-nogut o kes i bin kisim ples bilong mipela Yabob bikos em bilong ples



Pastor Japheth Imai i beten long rausim bel-nogut (curse) long ples Yabob.

Yabob," Sapur i tok.

"Longpela taim i kam na papa dai pinis na mipela ol pikinini i kamap bikpela na dispela ol tok i sutim bel bilong mipela oltaim."

Tok sori i bin stat long Madibraro, Kakon, Madib na Nop klen. Insait long dispela tok sori ol klen memba i tok sori i sekhan i go kam.

Bihain long sekhan Pastor Japheth Imai i prea long

komyuniti na rilisim o rausim olgeta bel-nogut na givim long Papa God.

"Papa God yet i save long olgeta samting mipela i mekim, na wanem samting bai kamap long tumora na ol yia i kam bihain em mipela i larim long han bilong Papa God tasol." Logan i tok.

Logan i makim maus bilong famili bilong em na Yabob komyuniti na tok tenkyu

i go long Pastor Japheth.

Em i givim tok tenkyu i go long lidaman bilong wan wan klen bilong Yabob em Garu Kaltam husat i makim Madibraro klen, Koroman Dalos blong Kakon klen, Dennis Kubod bilong Madib klen na John Baran bilong Nop klen.

Em i givim tok tenkyu i go long Yabob Musik Ministri em biknem musik man

bilong PNG, Demas Saul i go pas long en wantaim narapela strongpela solo atis Saul Akung na ben bilong ol long gutpela stail musik ol i kamapim long seremoni.

Logan i givim tenkyu tu long ol lain i redim program olsem Ulrich Sapush, Biddibud Gemo Junia na ol arapela husat i givim taim bilong ol long mekim restoren program.



Ol klen lida bilong wan wan klen long ples Yabob i sekhan i go kam na tok sori.



Wan wan klen lida i tok sori long Yabob restoren seremoni.



Wan wan klen lain i sanap long grup long go tok sori long Yabob Restoresen seremoni. Poto: James G. Kila



**Wantok**  
Komentri

# PNG politiks i no soim trupela mak bilong demokresi



Praim inista Peter O'Neill i risain tru o nogat? Mista O'Neill i bin tokim ol pipel bilong PNG na ol arapela kantri long wol tu long Sarere apinun long Pot Mosbi olsem em bai step daun long wok bilong Praim Minista. Na bai em i toksave long Gavana Jeneral long dispela samting. Mista O'Neill i tokaut olsem long taim em i lusim wok, bai Sir Julius Chan i go pas long ol arapela memba husat i stap wantaim em long gavman.

Tasol long Mande, Mista O'Neill i no toksave long gavana jeneral. Na ol loya bilong em i ran i go long kot long askim kot long skelim dispela mosen bilong vot i nogat bilip ol lain Oposisen i bin givim long spika bilong palamen.

Watpo na O'Neill i strongim kona bilong em yet, tupela de bihain long em i tokaut olsem em i risain olsem praim minista bilong PNG?

Planti toktok i kamap. Sampela savelain bilong lo i tok O'Neill i no risain tru. Em i Praim Minista yet. Em i mas salim toksave pas long gavana jeneral, orait gavana jeneral bai toksave long spika bilong palamen. Na spika bai singautim palamen na toksave long ol memba, orait ol i ken makim nupela praim minista.

Sampela lain i tok Mista O'Neill i no tok tru. Em i laik grisim ol memba husat i lusim gavman long go bek, olsem na em i tokaut olsem em i risain. Long Mande, Oposisen i tok ol i gat moa long 67 memba long kemp bilong ol na gavman i bin gat liklik namba tasol. Namba

i no klia tumas bikos ol memba bilong gavman i wok long muv i go long Oposisen.

Long taim Palamen i bung long 2 klok long Tunde apinun, spika i no givim sans long Oposisen i mekim senis ol i laik kamapim. Em i blokim rot bilong paitim toktok na dispela i hatim bel bilong ol memba. Ol pipel bilong PNG husat i lukim televisen brodkas bilong dispela bung bilong palamen, i sem long pasin ol lida i mekim long bikmaus i go kam na sampela i no soim rispek. Spika i stopim bung bilong palamen na muvim i go long Trinde 10

klok moning.

PNG i wet long lukim wanem samting bai kamap long plua bilong palamen long dispela wik. Bai kantri i gat nupela praim minista na gavman o nogat?

Nau em i gutpela taim tu long skelim pes bilong wan wan memba bilong yumi long palamen. Ol i trupela lida i wari long sindaun bilong pipel, o ol i lida husat i tingting long poket bilong ol tasol. Sampela bilong ol i stap long gavman bipo na i klia long ol hevi gavman i kamapim, tasol ol i bin pasim maus na

tok yesa tasol long ol disisen bilong gavman. Nau ol i kam joinim Oposisen na i opim maus na sutim tok long gavman. Na olsem wanem long ol dispela memba husat i kalap i go kam olsem ol yoyo? Em i mak bilong trupela lida o nogat?

Long taim ol politisen i wok long pulim na taitim long palamen, planti skul long NCD i bin pas. Ol tisa na ol papamama i pret long trabel i kamap olsem na ol stopim ol pikinini long go skul. Dispela pasin bilong stopim ol pikinini long go skul i kamap nomal nau long taim liklik pairap bilong politiks i kamap long Mosbi. Em i soim tu olsem ol pabliki no gat bilip long ol polis i ken mekim gut wok bilong lukautim lo na oda long kain taim olsem. Watpo bai ol pipel i pret na i no pilim fri long raun i go kam?

Yumi skelim ol samting i kamap long wok politiks bilong PNG long dispela wik. Yumi hop bai palamen inap abrusim ol rot blok i stap long plua bilong palamen nau. Wok bilong palamen em i bilong mekim ol gutpela lo bilong lukautim sindaun bilong ol pipel na stretim ol wari bilong pipel. Mobeta ol memba i spendim moa taim long mekim dispela wok ol pipel i bin makim ol long mekim. Em i taim bilong soim tru olsem PNG i wanpela strongpela demokretik kantri we palamen i sanap strong long lukautim ol pipel bilong yumi.

## Autim Tingting...

### Viles kot wokman i no gat pe

Dia Edita,

Mi laik autim wari bilong mi. Mi wanpela viles kot wokman na mi no kisim pe long foapela yia olgeta. Sampela ol i wet stap na indai pinis. Na hevi bilong ol dispela man, husat bai i kisim, mi no save. Dipatmen bilong Jastis bilong mipela i mas givim hariap bikos planti opisa ol i dai nating. Em tasol wari bilong mi.

**Mote Wapeia, NIP Viles Kot Maun Hagen**

long mekim wantok sistem. Em i karim sevis i go long Baiyer tasol na Mul i no kisim wanpela sevis. Long taim Sani Rambai i stap olsem memba, em i save givim sevis long tupela distrik wantaim.

**Tenkyu long Phone Aganist Corruption kempen**

Tenkyu long yupela karim

"phone Aganist Corruption" kempen i kam long mak bilong mipela ol pipel. Mi save ting olsem em pait bilong ol pipel long haia level tasol. Nau mi amams tru, mi save lukim ol kain korapsen long ai bilong mi yet na nau bai i gat sans long tokaut.

**Francis, Madang**

**Sapos yu gat sampela toktok o tingting, yu ken salim sms teks i kam long dispela digicel namba: 71845906 na bai mipela i putim long niuspepa.**

### Prais bilong kakao, kopi i no kam gut

Dia Edita,

OL keskrop bilong mipela long Is Sepik i no orait tumas. Long mipela long Sentral Sepik na Maprik i save lukautim sindaun bilong mipela long mani bilong wanpela keskrop tasol em Vanila. Mi laik mekim wanpela singaut i go long ol lain i save baim Vanila long lukluk na apim prais bilong vanila i go antap long K1000 wanpela kilo o moa. Mi wanpela man i save baim Vanila long Sentral Sepik.

**Ben Owinda Drekkir, Is Sepik**

### Mul-Baiyer MP mekim wantok sistem

Dia Edita,

Mi laik autim komplek bilong mi olsem Memba bilong Mul-Baiyer Koi Trape wok

## Word Publishing Company Limited

P. O. Box 1982, Boroko, NCD, PNG. Tel: (675) 325 2500 Fax: (675) 325 2579  
Email: [word@wantokniuspepa.com](mailto:word@wantokniuspepa.com)

### NOTICE OF ANNUAL GENERAL BUSINESS MEETING

Notice is hereby given that the Annual General Business Meeting of Shareholders of Word Publishing Company Limited will be held at the company office at Level 2, Section 24 Lot 25, Angau Drive (CNR LAHARA AVENUE), BOROKO, NCD, Papua New Guinea on Friday 21<sup>st</sup> June 2019, commencing at 9:00am.

#### ORDINARY BUSINESS

##### 1. Financial Statements

To receive and consider the Financial Statements; and the reports of the Directors and Auditors for the period ended 31 December 2018.

##### 2. Directors

*Election of Directors:*

Br Raj Kully, SVD retires by rotation in accordance with the Company's Constitution and being eligible, offers himself for re-election.

Rev Bernard Siai retires by rotation in accordance with the Company's Constitution and being eligible, offers himself for re-election.

Following is the current list of directors and when their terms end:

Br Raj Kully, SVD	term ends 2019
Rev Bernard Siai	term ends 2019
Fr Joseph Maciolek, SVD	term ends 2020
Rev Sommy Setu	term ends 2021
Bishop Denny Guka	term ends 2021
Fr Janusz Skotniczny, SVD	term ends 2021

##### 3. Appointment of Auditors

Star Business Consultants, the auditors for the past year, being eligible; offer themselves for re-appointment as auditors of the Company.

##### 4. Any other business of which notice is given.

Dated this 30<sup>th</sup> May 2019

By Order of the Board



Published Weekly, Thursday, for  
Word Publishing Company, Ltd.  
P.O. Box 1982, Boroko, NCD  
Papua New Guinea

**Telephone: (675) 325 2500**  
**Fax: (675) 325 2579**

**Email: [editorial@wantok.com.pg](mailto:editorial@wantok.com.pg)**

**Pe bilong wanpela yia**  
**52 niuspepa**

<b>Ples:</b>	<b>Air:</b>
<b>PNG</b>	<b>K:230.00</b>
<b>AUSTRALIA</b>	<b>US\$120.00</b>
<b>ASIA PACIFIC na JAPAN</b>	<b>US\$150.00</b>
<b>AMERICA na EUROPE</b>	<b>US\$210.00</b>

**General Manager**  
Elizabeth Konga

**a/Editor**  
Paul Zuvani

Printed and Published at:  
Dove Travel Building, Level  
2.; Section 24, Lot 25,  
Angau Drive/ Lahara Avenue  
Junction, Boroko

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.



Publisher of The





# LUSIM PASIN SIMUK

# EM KEN SOTIM LAIP BILONG YU



**CHOOSE HEALTH NOT TOBACCO**

**31 MAY WORLD NO TOBACCO DAY**

**#NoTobacco**





STORI TUMBUNA

# Zeus na ol tupela brata bilong em i winim Cronus

**D**ISPELA stori Otumbuna i kam long kantri Greece.

Stori tumbuna bilong ol Greece i toktok long Zeus, husat i king bilong olgeta god na em i save stap wantaim meri bilong em Hera, long Mt Olympus. Tasol ol dispela god em ol nupela god. Stori bilong ol i tok Mama Graun i bin kamap pas na pikinini man bilong em Uranus i wokim graun yumi lukim tude. Em i wokim ol diwai na enimal na pisin na olgeta samting long graun.

Orait Mama Graun i karim ol bikpela sais man tru (giant) husat i gat tripela het na ol Cyclops husat i gat wanpela ai tasol. Tasol Uranus i no amamas long ol dispela wan ai Cyclops na em i kalabusim ol aninit long graun. Mama Graun i wari long dispela pasin nogut Uranus i bin mekim long ol namba wan lain pikinini bilong em.

Bihain Mama Graun i karim 6-pela pikinini man na 6-pela pikinini meri, na ol dispela pikinini bilong em i kamap ol Titan, ol olupela god. Namel long ol dispela god em Oceanus, Cronus na Rea.

Mama Graun i tokim ol Titan long kilim Uranus long bekim dinau bikos em i kilim ol arapela brata bilong ol. Cronus i harim olsem na long taim Uranus i slip i stap, isi em i kisim ston naip na katim nek bilong em. Long taim Uranus i laik dai, em i tokim Cronus olsem wanpela pikinini bilong em yet bai kilim em.

Cronus i kamap king bilong ol Titan na i bosim ples wantaim Rea. Long taim Rea i karim pikinini Cronus i save daunim ol. Em i pret bikos em i tingm toktok bilong Uranus. Em i mekim olsem long faivpela pikinini bilong Rea.

Long taim Rea i gat bel long namba 6 taim, em i hait tasol na i go stap long Mt Lycaeum long hap bilong Greece ol i kolim Arcadia. Em i stap long hap inap em i karim bebi Zeus. Rea i haitim em long wanpela hul long maunten, wantaim tripela yangpela meri, Adrastei, lo na Amaltheia. Zeus em i namba wan bilong ol nupela god long kamap.

Long taim Cronus i painim aut olsem Rea i trikim em, em i belhat tru na i wok long painim dispela bebi. Rea i wok long haitim Zeus long planti hap tasol em i save olsem i no longtaim bai Cronus i painim na kilim em. Olsem na em i kisim wanpela ston na i karamapim long laplap bilong ol bebi na i karim i go long Cronus na giamanim em olsem dispela i pikinini bilong em. Cronus i harim olsem na i kisim dispela ston na daunim wantu tasol.

Ol tripela meri i lukautim Zeus inap em i

kamap bikpela man. Mama bilong em i stori long ol bratasusa bilong em. Orait tupela i go lukim wanpela lapun Titan meri, Metis, na em i tokim ol long wanem samting ol i mas mekim.

Cronus i no bin lukim Zeus olsem na em i no luksave long em taim Rea i kisim em i go na tok bai em i kamap wokman bilong Cronus. Zeus i stap olsem gutpela wokman bilong Cronus. Wanpela de em i putim posin long drink bilong Cronus. Em i sik nogut tru na i trautim ol arapela pikinini bilong Rea em i bin daunim bipo, Hades, Poseidon, Demeter, Hera na Hestia. Cronus i trautim tu dispela ston Rea i bin giamanim em na tok i pikinini bilong em.

Hades, Poseidon na Zeus i bung na pait wantaim ol Titan. Cronus i lapun olsem na Atlas i go pas long ami bilong long ol Titan. Zeus na ol brata bilong em i no gat planti man bilong pait, olsem na em i go daun long ples aninit long graun, na i lusim ol wan ai Cyclops long kalabus na karim ol i kam antap helpim em. Ol Cyclops i amamas tru na i givim tripela spesel presen long Zeus, Hades na


Poseidon. Ol i givim laitning long Zeis, Hades i kisim wanpela helmet long taim em i putim bai em i lus nating. Na Poseidon i kisim wanpela longpela spia i gat tripela ain het long em.

Ol tripela brata i go na lukim Cronus wanpela i stap. Orait Hades i putim helmet na i go stilim ol samting bilong pait arere long Cronus. Taim Cronus i lukim olsem na i laik painim, Poseidon i holim spia na stopim em na Zeus i tromoi laitning na kilim Cronus i dai.

Long taim Cronus i dai, ol arapela Titan i givap long pait. Ol Cyclops i tromoi ol ston i go daun na kilim planti bilong ol. Ol god i salim olgeta Titan i go long Tartarus, ples aninit long graun we ol pipel i save pilim pen oltaim. Tasol Cronus i go stap long ples bilong amamas, Elysian Fields na Atlas, woa lida bilong ol, i karim hevi bilong skai antap long solda bilong em olgeta de.

Zeus i stap long Olympus wantaim ol arapela god. Tasol Hades i lusim ol na i go bosim ples aninit long graun we ol lain i dai i save go stap

Halivim liklik Tony i go bek long haus bilong em



## PAINIM WOD PILAI

L	A	E	N	B	T	S	C	I	J	F	N	P	S	B	L
H	G	F	A	L	A	I	M	I	N	I	H	O	I	N	O
G	D	K	R	G	B	L	J	P	C	L	F	M	L	A	R
N	E	N	N	I	A	N	I	M	I	N	U	A	D	I	D
T	A	A	I	T	K	F	A	S	A	L	U	O	J	D	L
T	M	J	H	A	M	A	I	M	I	M	N	E	E	I	F
P	L	U	E	F	M	A	I	P	A	M	A	N	O	N	C
A	G	I	N	I	V	A	O	L	E	S	N	G	I	A	T
I	F	E	T	S	E	L	P	N	A	M	I	A	D	M	O
Z	S	E	I	T	A	Y	O	A	D	N	L	L	H	B	T
L	P	D	U	K	G	R	R	I	L	N	U	I	E	A	V
S	O	S	G	N	T	H	H	E	A	A	A	M	G	G	N
L	K	B	R	O	B	F	L	W	N	S	I	B	A	R	O
C	S	Q	T	B	I	F	F	O	B	E	E	O	G	I	W
F	Q	D	E	M	B	F	P	A	S	F	S	N	N	N	M
Q	R	M	T	S	D	S	D	Z	S	I	O	G	C	S	A

### OL WOD LISTA:

- AFRIKA,
- SPETIM,
- BALISIM,
- TABAK,
- DAIMANPLES,
- ULA,
- GALIMBONG,
- VINIGA,
- HAMAIM,
- WANLAIN,
- KAIL,
- YATI,
- LAIMIN,
- AIDIN,
- MANGAS,
- BAKET,
- NAMBA,
- DAUNIM,
- ONA,
- GRIN,
- PALAI,
- KALOPILUM,
- RABIS,
- LEGO,
- SAMAN,
- MAIN,

## Stori i kam long Buk Baibel

### Samuel i makim Devit i kamap king

Bihain Bikpela i tokim Samuel olsem, "Oltaim yu save bel hevi long Sol. Wanem taim bai bel hevi bilong yu i pinis? Mi bin rausim em pinis, na long ai bilong mi em i no moa stap king bilong Israel. Orait nau mi laik bai yu kisim wanpela kom bilong sipsip na pulimapim wel bilong oliv long en, na yu go lukim Jesi, wanpela man bilong taun Betlehem, long wanem mi bin makim wanpela bilong ol pikinini man bilong en long kamap king." Tasol Samuel i tokim Bikpela olsem, "Bai mi mekim dispela samting olsem wanem? Sapos Sol i harim tok bilong mi mekim olsem bai em i kilim mi dai." Orait Bikpela i tokim em, "Nogat. Kisim wanpela yangpela bulmakau meri i go long Betlehem na tokim ol manmeri bilong dispela taun olsem, "Mi kam bilong mekim ofa long Bikpela. Na yu mas askim Jesi long kam long dispela ofa na bai mi tokim yu long wanem samting yu mas mekim long Jesi. Na mi bai tokim yu long long husat man yu mas makim bilong kamap king."

Orait Samuel i bihainim tok bilong Bikpela na i kirap i go long Betlehem. Em i go kamap na ol hetman bilong taun i bungim em. Ol i pret na guria nogut na i askim em olsem, "Glasman, olsem wanem? Yu kam bilong mekim gut long mipela o nogat?" Na Samuel i tok, "Mi kam bilong mekim ofa long Bikpela tasol. Yupela i mas mekim yupela yet i klin long ai bilong God pastaim na bihain yupela i ken kam wantaim mi long mekim ofa."

Na em i go long Jesi na i tokim Jesi wantaim ol pikinini man bilong em long bihainim pasin bilong kamap klin long ai bilong Bikpela na i askim ol long kam long dispela ofa.

Ol i kamap pinis na ol i sanap long ai bilong Bikpela. *Stori bilong Sol na Devit (Sapta 16-31)*

*Neks wik - Samuel i makim Devit.*

Ends..



# Bogenvil Yumi Wan Festival bungim pipel

**Hilda Wayne**

Wanpela bikpela festival long Bogenvil i bungim olgeta pipel long provins aninit long het tok bilong kamapim gutpela sindaun pastaim long Bogenvil referendum i kamap. Ogenaisa bilong Bogenvil Yumi Wan Festival, Robert Anisia i tok dispela festival i bungim ol pipel na lida yusim art na kalsa na musik na em i amamas long sapot bilong ol pipel na lida.

Dispela taim tu ol meri na yut i toktok wantaim ol lida bilong ol long tingting bilong referendum we bai

kamap bihain long dispela yia. Bogenvil Yumi Wan Festival i gat dispela het tingting em Peace and Unity Guarantees Prosperity for Bougainville.

Mista Anisia i tok ol lida i bin bungim ol pipel long taim bilong dispela festival we i bin kamap las wik. Em i tok namel long program bilong bilas danis na singsing tumbuna, i gat ol lokal bambu ben tu i stap insait long ol olgeta ektiviti.

Narapela samting we i kamap, em ol pipel i bin gat sans tu long askim ol lida bilong ol long wanem tingting

ol i gat long referendum na dispela i kamapim gutpela luksave namel long ol.

Wanpela meri lida long Mekamui long Panguna, Stella Bangki i tok ol pipel bilong em i stap redi long referendum na kisim ful independens.

Em i tok planti laip i bin lus pinis na ol i laikim gutpela sindaun bihain long referendum.

Ms Bangki i tok em yet wantaim pipel bilong em i amamas tu long bungim ol lida na toktok moa long redi long wok bilong kisim independens long Bogenvil.



Bogenvil Yumi Wan Festival bungim ol pipel. (Facebook Barbara Tanne)

# Moa lida lusim gavman bilong O'Neill

**Hilda Wayne**

Wanpela bikpela politikal developmen i kamap long wiken taim moa memba na minista bilong gavman bilong Praim Minista Peter O'Neill i lusim gavman na go joinim sait bilong memba Tari Pori na Fainens

Minista bipo, James Marape. Sampela bilong ol minista husat i go long sait bilong Oposisen em William Duma, Jelta Wong, Wera Mori na Pila Niningi.

I gat ripot nau olsem namba bilong Oposisen i stap long 62 memba olgeta.



Ol minista lusim O'Neill gavman

# Is Nu Briten skruim egrikalsa long komyuniti

**Hilda Wayne**

Wanpela man long Is Nu Briten provins i kamapim wok egrikalsa long liklik komyuniti bilong em long helpim ol yut long lusim hevi bilong lo na oda, na ol mama husat i laik long kisim moa save long faming.

Murphy Selep i bin statim dispela projek wantaim famili bilong em, tasol intres long dispela wok i wok long kamap bikpela, na nau em i

plen long skruim dispela wok i go bikpela.

Em i tok planti ol yut i save stap nating na dispela projek i wok long helpim ol long yusim gut graun na taim bilong ol.

Mista Murphy i tok olsem narapela grup husat i save askim long helpim tu em ol mama na meri grup long komyuniti bilong em.

Em tok tenkyu long olgeta sapot dispela projek bilong em i save

# Solomon Ailan meri helpim ol skul long stopim cyber bullying

**Gina Kekea**

Ol savemeri bilong Infomesen Teknoloji o IT, i bungim ol skulmeri long Solomon Ailan na helpim ol long lainim ol rot bilong lukautim ol yet long kain hevi olsem cyber bullying na pornography o ol piksa nogut long intanet.

Aninit long grup ol i kolim Women in IT Solomon Islands (WITSI), ol i bungim ol meri sumatin long ol skul na toktok long ol long hevi we planti meri i save lukim long IT.

Presiden bilong WITSI, Alice Aote'e i tok dispela bung i kisim sapot long planti ogenaisan na bisins long Solomon Ailan.



Hevi bilong Manam pipel i stap, yet maski mani i go pinis. Foto: Facebook

# Resetelmen mani i no go yet long ol Manam

**Hilda Wayne**

Ol piple bilong Manam Ailan bilong Madang provins, bai wetim yet helpim i kam long gavman maski i gat ripot olsem nesanel gavman i givim pinis 6 milien kina pinis long helpim ol.

Long wanpela pas i go long opis bilong gavana bilong Madang, Peter Yama, Minista bilong Inta Gavman Rilesens, Kevin Isifu, i bin mekim wanpela tok lukaut olsem ol mani bilong ol Manam pipel i mas go stret long Manam Risetlemen Atoriti (MRA) long helpim wok bilong ol wantaim ol pipel bilong Manam.

Tasol siaman bilong Manam Risetelmen Atoriti, Ken Fairweather,

i tokim Radio Australia olsem ol i wok long yet long dispela mani.

Gavman i bin givim K6 milien i go long MRA long mekim dispela wok.

Minister Kevin Isifu i bin salim wanpela pas i go long Gavana Yama long mun Epril 29, long wanem em i tok em i bin kisim sampela ripot olsem mani we gavman i bin givim long MRA em Madang provinsal gavman i no bin givim long dispela wok.

Mista Yama i tok em i no bin kisim wanpela pas na em i no laik toktok long dispela samting.

Mista Fairweather i tok tu olsem ol i no kisim mani yet long mekim wanpela wok long helpim ol pipel bilong Manam.

Em i tok yet olsem i gat moa hevi yet i wok long kamap namel long ol papagraun long bikples na ol Manam pipel. Ol i askim long surukim ol Manam pipel i go long resetelmen graun em gavman i bin makim pinis long ol lain i ken statim nupela laip.

Mista Fairweather i tok ol i bin kisim sampla kontrakta long mekim wok tasol no gat mani long baim ol.

Narapela ripot i kam long Bunabun eria bilong Sumkar i soim tu olsem i gat hevi yet taim pait i bin kamap namel long ol papagraun na Manam pipel.

Jenny Singur bilong Bunabun i tok ol i bin kukim moa long 20 haus taim pait i bin kamap long hap.

# Bung bilong kopi bisnis i kamap gut

Ol save lain insait long kopi indastri long Papua Niugini, i tok i gat moa hevi o salens yet long strongim kwaliti bilong kopi.

Ol dispela save lain na sampela fama insait long PNG kopi indastri i bin bung long wanpela bikpela miting long Pot Mosbi, ol i kolim "Coffee Symposium." Ol i bin toktok long ol kain rot bilong helpim long strongim kopi prodaksen long PNG long helpim ol fama long makim gutpela prodak i go long wo

Ol hevi olsem infrastraksa na kwaliti bilong kopi i kamap long dispela bikpela bung.



Ol fama i soim kopi bilong ol long Kopi Indastri bung long Pot Mosbi las wik.



# Namba bilong turis i go bikpela

NUPELA wok painim i soim olsem 95,000 manmeri i bin kam long Papua Niugini long 2018.

Dispela i lukim kantri i kamapim K690 milien (US\$205 milien) taim ol turis i yusim mani bilong ol long kantri.

Intenesenel Fainens Kopresen, wanpela han

bilong Wol Benk i tok olsem Intenesenel Visita Sevei (IVS) we i wok wantaim Papua Niugini Turisim Asosiesen na Nu Silan Turisim Risets Institut, i soim olsem stat long 2017 namba bilong ol manmeri long nara-pela kantri i kam long PNG i wok long kamap bikpela.

Ol turis i yusim bikpela hap bilong mani long baim ples bilong slip, ran bilong balus, kaikai na dring.

Risets i soim olsem ol lain i kam long holide i yusim bikpela mani we ol i stap long kantri moa long 10-pela nait.

Dispela i soim ol i yusim olsem US\$2500

(K8333) long kam na stap long PNG.

Dispela ol lain i mekim olsem 33 pesen bilong ol lain i kam long kantri long 2018. Tasol makim dispela namba, dispela i lukim namba i kisim 26 pesen long gro long namba em bilong 2017.

Namba bilong ol lain i kam long bisnis i bikpela

moa long ol arapela we i kisim olsem 50 pesen bilong olgeta lain husat i kam long kantri.

Ol i save stap 9-pela nait na dispela i lukim wan wan bilong ol i yusim olsem US\$2170 (K7482).

"Dispela sevei i soim strong Papua Niugini i ken groim turis maket," John

Vivian, IFC Residen Representetiv bilong Papua Niugini, i tok

"Dispela i lukim seven pesen gro bilong ol lain husat i kam long nem bilong holide long 2018.

"Wok painim i soim olsem ol turis i wari long long sefti na sekyuriti wantaim infrastraksa olsem bilong ol samting em ol i mas

wok long ol. Tasol maski long dispela ol hevi 90 pesen manmeri i tok ol i laik kam bek long kantri."

Ripot bilong wok painim i soim olsem PNG namba bilong ol manmeri i kam long Australia olsem turis bikpela moa, olsem 50 pesen bilong ol i kam long Australia.

## Kokoda Trek pulim moa turis



Sampela ol sumatin bilong Australia i kam long PNG na wokabaut long Kokoda Trek. Foto: File

SAPOS i gat wanpela hap we i pulim moa turis long kam long kantri, dispela em Kokoda Trek.

Namba bilong moa turis i kam long wokabaut long Kokoda Trek long Noten Provins.

Dispela ol lain i bilong Australia na ol i kam long bihainim lek mak bilong Australia ami wantaim ol poroman kantri bilong em husat i pait long woa egensim Japan long Wol Woa II.

Turisim Promosen Atoriti (TPA) Sif Eksekutiv Opisa, Jerry Agus i tokaut long dispela long taim TPA i bung wantaim Intenesenel Fainens Kopresen (IFC) long tokaut long namba bilong ol turis i kam long kantri.

Sevei IFC i karimaut i soim olsem namba bilong ol manmeri i kam

long kantri i go antap long 95,000 manmeri long 2018.

Dispela i lukim kantri i kamapim K690 milien (US\$205 milien) taim ol turis i yusim mani bilong ol long kantri.

"Papua Niugini i gutpela kantri we inap long pulim moa turis i kam long kantri," Angus i tok. "Turism Promosen Atoriti i laikim helpim bilong olgeta sekta long lukim dispela industri i gro.

"I gat ol hevi olsem lo na oda, ol rot na infrastraksa olsem rot na bris na lo na oda tasol olgeta sekta i mas givim sapot long dispela.

"Bikpela tingting bilong TPA em long strongim wok bilong turis long kantri.

"Mipela i askim olgeta lain, grup o wan wan ol

manmeri long mekim ol wok long pulim na sapotim gro bilong turis long kantri.

Risets bilong transpot i wanpela samting ol turis i lukim olsem i salens long ol.

Arere long Pot Mosbi, Sentral, Morobe na Noten provins em ol sampela ol hap planti ol turis i save go long ol.

Long 2018 i gat mak bilong ol turis i go long Milen Be i kisim 25 pesen long go antap moa long em i kisim long 2017.

Long ol lain i go long Is Nu Briten, dispela i go antap long 17 pesen.

TPA wantaim ol arapela lain i tok long kamapim ol kain samting olsem lukim ol pisin, skuba daiving na lukim ol olupela samting bilong pait long woa.

## Nupela gavman bai stretim LNG agrimen gen



Hides Gas Kondisening Plent long Hides, Hela Provins. Foto: File

### Stanley Nondol i raitim

OL papagraun bilong PNG LNG i tok kantri i salim ges bilong ol go aut long wol maket pinis tasol ol i no kisim royalti mani yet na ol i singaut long nupela gavman i mas baim ol bikos em i longpela taim tumas.

Ol papagraun bilong Moran long paipain eria i tok PNG gavman long las 7-pela yia i bin giamanim ol papagraun na i no baim ol royalti mani stat long 2013 i kam inap nau. Na planti bilong ol i no kisim royalti mani na i dai pinis.

Siaman bilong gas paipain eria, Gibson Walape i tok gavman i kisim longpela taim tumas long baim papagraun bikos gavman, di-

velopa na papagraun i no stretim agrimen gut taim ol i sainim LNG agrimen.

Ol sampela samting we i no go gut long agri-

men em klen vetting o lenona ID we i mas kamap pastaim long gav-

man bai tokim ol papagraun long sainim agrimen wantaim divelopa na gavman. Tasol ol papagraun i no klia na ol i sainim agrimen na larim projek i ran tasol bihain ol i hat long kisim royalti mani.

Mista Walape i makim paipain eria long Beneria eria we LNG gas i ran long paipain olsem 5 I go long 40 kilomita, i tok ol i bin wokim klen vetting pinis tasol dipatmen bilong Petroleum na Eneji o DPE wantaim Mineral Risos Developmen Kampani o MRDC i no go long eria yet na opim benk akaun bilong mani bai go insait.

Em i tok klen vetting i pinis, ministriel diteminesen o ministria givim tok orait tasol MRDC na DPE i no go opim akaun na gavman i bin giamanim ol olsem ol bai go

na em i longpela taim nau.

Mista Walape i tok ol papagraun i gat bikpela bilip olsem nupela gavman bai luksave long ol LNG papagraun i ken kwiktaim stretim ol pepa wok na baim mani bilong ol i stap insait long agrimen bilong PNG LNG projek.

Mista Walape i tok Petroleum Minista i sainim pepa na 28 de bilong lukluk long ol komplemen na wari bilong papagraun i pinis na em i kisim moa long 17 mun olgeta.

Em i tok olsem MRDC na DPE i tok ol bai go long paipain eria long sekmen o blok 2,3,4 na 5 long opim benk akaun tasol i no go yet na ol i wok long srukim taim go moa na ol papagraun i no klia long givim wanem as ol i kisim longpela taim.

Long wankain taim, Memba bilong Tari Pori,

James Marape na Gavana bilong Hela Philip Undialu i tok kantri i salim 500 sipmen bilong gas kago aut long wol maket tasol ol papagraun i no kisim royalti na levi mani bikos klen vetting i no kamap yet.

Mista Undialu i tok klen vetting i mas kamap pastaim long LNG ges projek bai stat tasol dispela i no kamap. Klen vetting i no kamap na gas projek i bin ran.

Mista Undialu i tok dispela em bikpela as tingting we ol memba bilong Sauten Hailans na Hela i bruk long gavman bilong O'Neill.

Mista Undialu i tok nupela gavman bai kamapim rivu long ol agrimen bilong PNG LNG Gas. Em i tok moa ol i gat bikpela asua i stap insait long ges agrimen blong Papua LNG we gavman, divelopa Total na papagraun bin sainim pinis.

## BSP sapotim CPA wantaim K50,000

BIKPELA komesel benk, Benk Saut Pasifik (BSP) i sapotim bung bilong ol Setifaid Praktising Akuntan long 2019 wantaim K50,000.

Dispela ol bung bai kamap long Kokopo long Is Nu Briten, Lae (Morobe), Pot Mosbi (NCD) long 21 i go 22 Jun.

Benk i givim dispela helpim wantaim tingting olsem wok bilong lukau-

tim na menesim mani i bikpela samting long kamapim gutpela divelopmen.

Hetman bilong Fainensel Ripoting bilong benk, Douna Vaname i tok em i gutpela long lukim ol fainens na benkung profesenel i gat ples bilong bung na serim ol tingting na save.

"Sapot mipela i givim i skruim tingting mipela i

gat long givim sapot na strongim ol kain wok i stap,"

CPA Ogenaising Komiti, Jeff Undah i tok kain sapot i helpim gut gru.

"Komiti i amamas long sapot BSP i save givim long las 18 yia.

"Wankain olsem long ol yia i go pinis, dispela bung bai pulim ol fainens na akaunting profesinel

long PNG wantaim ol intenesenel akauntent.

"Dispela i wanpela bikpela bung bilong mipela na dispela i salens bilong ol yangpela bilong Papua Niugini na ol lain husat i save long ol i mas mekim gut long givim gutpela sevis long ol pipel.

"Dispela yia mipela i lukluk long strongim wan wan ol save wok bilong mipela."



CPA PNG ogenaising komiti i kisim sek long Hetman bilong Fainensel Ripoting bilong BSP Douna Vaname (namel raitan). Foto: BSP



# Ol atis apim nem bilong PNG

**Jacklyn Kimala i raitim**

JOE Nalo em i bilong Manus na em i bin stat wok atis taim em i bin liklik pikinini long Manus provins.

Joe i bin stat taim em i no go skul yet, dispela atis wok em stap long blut bilong olgeta famili na taim ol laik go skul ol i save yusim wesana bilong solwara long wokim disain long en na dispela em stat bilong wok bilong em long wok atis.

“Long sait bilong art na kalsa, mi i bin raun long olgeta hap bilong wol na i gat sampela koneksen wantaim ol arapela intensenel kantri,” Joe i tok.

Joe Nalo i tok nau em i lukluk long klaimet senis bikos olgeta art em stap long graun, olsem na em i save yusim graun gut long wokim dispela art kalsa.

Em i bin stat long 1958

long wokim ol atis wok inap nau komisin.

Joe i bin kamap bod memba bilong atis wok olsem lida bilong ol arapela grup atis insait long kantri wantaim kain kain stail bilong ol.

Sampela taim ol atis i go long skul long soim atis wok bilong ol tasol long em i save yusim stail bilong em yet kain olsem yusim ol wara kala.

Dispela indastri bilong atis em developmen program bilong ol yangpela pipel long joinim na lainim long ol tumbuna, na tu wanim samting ol i save bihainim long wok atis.

“Ol tred mak bilong wan wan atis i soim ol pipel olsem dispela em han mak bilong ol atis na taim ol lain lukim ol bai tok dispela em han mak bilong ol,” Joe Nalu i tok.



Olgeta atis bilong PNG i bin bung wantaim ol bikpela sponsa bilong ol, Theorists, B-mobile na Coral Sea Hotel long Gateway Hotel las wik. (Foto Jacklyn Kimala)

## MAF STORI

### MAF pailot i helpim wok bilong edukesen



Redi long nupela skul yia. Wanpela Twin Otter i karim ol skul saplai bilong Telefomin Haiskul long Vanimo i go long Telefomin.



Wanpela Twin Otter i karim ol studen i go long Telefomin Haiskul.

**Story Ryan Cole. Foto Richie Axon**

Sampela taim ol lain i save askim mi – Ol MAF pailot i save mekim wanim? Bekim bilong dispela askim i narakain long wan wan kantri we MAF i wok.

Long PNG mipela i save mekim planti wok. Wanpela de mi ken mekim wok bilong karim ol pas; narapela de mi karim ol sikman; narapela de karim bodi bilong daiman na planti arapela wok. Wanpela bilong ol dispela wok em i olsem skul des draiva!

Long taim skul i stat long PNG long begin bilong mun Februari, wanpela bikpela wok mipela i save mekim em long karim ol tisa na studen i go bek long skul.

I no gat planti haiskul long PNG olsem na planti bilong ol em ol boding skul. Mipela i save flai i go long ol liklik ples na kisim ol studen i go long ol bikpela ples we ol haiskul i stap, olsem Telefomin na Tekin long Sandaun provins.

I no gat ol rot long dispela hap. Ol pipel i mas wokabout planti de long go kamap long narapela hap, olsem na planti bilong ol dispela studen bai i no inap long lukim famili

bilong ol gen inap skul i pinis long mun Desemba. Tasol ol i luksave olsem edukesen em i bikpela samting inap helpim laip bilong ol na famili olsem na ol i wokim bikpela sakrifais.

Long mun Oktoba, ol studen i save wokim fainal eksam bilong ol. Em i isi long ol skul i stap long taun. Tasol ol liklik skul long ol ples longwe i mas wet inap balus bilong MAF i karim ol eksam pepa i go kamap long ol.

**Flying for Life**

Las yia, mi bin gat sans long karim ol eksam pepa long mun Okotba i go long ol ples long Teklin, samting olsem 30 mail is long Telefomin. Long Teklin, i gat wanpela haiskul em misineri tisa, Glenda Giles, i bin kirapim. Em i wok yet long hap tasol nau em i wok long givim trening skul long ol lokal tisa long kisim ples bilong em.

Ol studen bilong em i bin amamas long lukim ol eksam pepa i kamap bikos i no gat inap spes long haiskul long kisim olgeta pikinini. Ol studen long ol ples longwe i save wari tru long sindaun long eksam na kisim sans long go long haiskul.

Narapela skul mi bin

karim ol eksam pepa i go long en em Gubil, 15 mail not long Telefomin. Ol i gat wanpela praimeri skul tasol ol studen i amamas long kisim ol eksam pepa na ol i stat long danis raun long balus.

Wanpela las ples mi bin karim ol eksam pepa i go long en, em Fiyak. Dispela ples i stap 30 mail not long hap we mipela i save stap.

Ol studen long Fiyak i no bin gat eksam long 2017 bikos ol i no bin gat skul long dispela taim. Olsem na ol i bin amamas tru long taim mi karim ol eksam pepa i go kamap long ples bilong ol.

Dispela jeneresen bilong ol yangpela pipel i gat sans nau long kamapim gut laip bilong ol na skruim save bilong ol long skul. Papamama bilong ol i no bin gat dispela sans.

Long dispela skul i bin gat 17 studen husat bai wokim eksam long 2018, na planti bilong ol i bin wokabout longwe long ples bilong ol kam long Fiyak. Long taim mi rausim ol bokis i gat ol eksam pepa long en, wanpela man bilong ples i tokim mi long sanap arere long balus na ol pipel i singsing raun long mipela. Ol tripela bikman bilong ples i karim ol ek-

sam pepa i go na ol arapela i sekhan na tokim mi olsem em i blesing long ol pikinini bilong ol i skul na nau bai ol i wokim eksam.

Mi wari tasol bel bilong mi i amamas tu bikos dispela wok bilong karim ol eksam pepa i go long ol ples longwe, i bringim sans tu long ol gutpela senis i kamap long ol dispela liklik ples.

Mi mas tokaut olsem mi no bin lukim ol eksam pepa bilong mi olsem wanpela blesing, nogat. Mi lukim olsem eksam em i samting i save givim hetpen. Tasol long taim mi lukim pes bilong ol dispela pipel bilong ol longwe ples insait long PNG, mi tok tenkyu long God long blesing em i givim mi long edukesen bilong mi na ol rot em i opim long laip bilong mi. Mi hop ol arapela pikinini long wol i luksave tu olsem edukesen em i wanpela blesing long laip bilong ol.

Mi hop bai yu serim dispela stori wantaim wanpela studen na bai ol i ken luksave olsem edukesen na eksam em i bikpela samting na bai ol i ken litimapim nem bilong God na tok tenkyu long em long planti blesing em i givim long laip bilong ol!





# Raibus Security sainim K20 million kontrak wantaim Ramu NiCo

**B**IKPELA sekyuriti kampani bilong ol papagraun long Ramu NiCo Projek insait long Madang, Raibus Security Services Ltd (RSSL) i bin sainim K20 million kontrak wantaim Ramu NiCo Projek long surukim wok sekyuriti i go moa long 3-pela yia.

Dispela agrimen i bin kamap long Mande Me 13, 2019 long Ramu NiCo opis. Presiden bilong Ramu NiCo, Gao Yongxue i sainim dispela kontrak makim Ramu NiCo na RSSL Jeneral Menesa, Mathew Denguo i makim RSSL. CEO bilong Raibus Ltd, Kenny Kerry, Moses Kumura, Deputi Siaman bilong Raibus Ltd, Charlie Hu, Jeneral Menesa bilong Kopret Opis Ramu NiCo na Menesa bilong Komyuniti Afes long Ramu NiCo, Albert Tobe i bin witesim dispela kontrak seremoni.

Long stat bilong RSSL long 2007 i kam inap nau, dispela i namba 4 kontrak. Dispela kontrak i lukim sampela luksave olsem CPI (Consumer Price Index) we ol i putim, velu bilong kontrak i go antap na surukim namba bilong ol gad long 180 i go antap long 185.

RSSL em sabsederi kampani bilong mama kampani, Raibus Ltd, ol papagraun bilong Ramu NiCo Projek long Kurumbukari Main insait long Usino-Bundi distrik i kam long Basamuk Refinery long Raikos Distrik na 135km Paipain komyuniti i kisim gutpela samting long em. RSSL i save kamapim sekyuriti sevis long Ramu NiCo projek long Kurumbukari Main and Basamuk Rifaineri long Raikos.

RSSL i save kisim kontrak tu wantaim ol narapela kampani insait long Madang provins olsem National Airport Corporation (NAC) na HBS, kampani we nau i stretim Madang airport na ol narapela kampani long Madang tu.

Ol narapela sabsideri kampani bilong Raibus Ltd em NCS-Raibus we i save kukim kaikai bilong ol wokman meri long Kurumbukari Mine and Basamuk Rifaineri, Raibus Engineering na Raibus Property we i save menesim ol properti o ol haus.

Long taim bilong sainim dispela kontrak, Ramu NiCo menesmen wantaim RSSL na Raibus menesmen i pasim strongpela tingting long wok bung wantaim long kamapim ol lenona kampani i go bikpela ol papagraun i ken kisim ol gutpela samting long em.

Dispela wok bung wantaim ol i laik bai kamap ananit long moto na visen bilong Ramu NiCo, "One Ramu NiCo - One Community", we i gat bikpela as tingting long kamapim Ramu NiCo projek olsem wanpela kampani stret bilong ol Ramu NiCo Projek papagraun na ol yet i mas lukautim long kamapim bikpela benefit long en.

Ramu NiCo Presiden, Gao Yongxue i tok RSSL i save bungim planti salens long stat bilong kampani long 2007 i kam inap nau tasol RSSL tu i bin abrusim planti bilong ol dispela salens na i kamap wanpela bikpela sekyuriti kampani insait long Madang we i mekim Ramu

NiCo menesmen i amamas long sainim kain kontrak long givim moa benefit i go long ol papagraun.

"RSSL em ol papagraun bilong Ramu NiCo i papa long en na Ramu NiCo Projek i amamas long sapotim ananit long het tok bilong en, "One Ramu NiCo-One Community,"

"Mipela i gat bikpela bilip olsem wanpela de bai RSSL bai kamap wanpela bikpela na sekyuriti kampani insait long Madang na PNG we mipela olgeta bai amamas long em," Gao i tok.

Mista Gao i tok dispela nupela kontrak i gat planti gutpela senis long ol pastaim kontrak na dispela i kamap ananit long luksave long kopret risponsibiliti bilong Ramu NiCo we ol papagraun i mas kisim gutpela samting long dispela projek. Dispela ol gutpela senis aninit long kontrak i kamap tu maski i gat bikpela hevi mani long Ramu NiCo.

Jeneral Menesa bilong Raibus Security, Mathew Denguo i mekim bikpela tok amamas bilong em i go long Ramu NiCo long bikpela luksave long nupela bisnis kontrak na i promis olsem Raibus Sekuriti bai traim best bilong em long kirapim RSSL na i mekim gutpela senis long ol kain sekyuriti sevis i go antap na givim moa gutpela samting i go long Ramu NiCo, RSSL na ol papagraun.

Deputi Siaman bilong Raibus Ltd, Moses Kumura i makim maus bilong ol papagraun na tok tenkyu long Ramu NiCo we i kamapim ol kain bisnis long lukim ol papagraun bilong Ramu NiCo projek benefit.

"Mi gat bikpela amamas long Ramu NiCo Projek bilong wanem sapos no gat Ramu NiCo bai no gat kain ol bisnis wok bilong yumi ol papagraun,"

"Raibus i bin kam longpela rot wantaim kain kain salens, tasol mipela i bin abrusim planti ol dispela birua na long wok hat yet long mekim dispela papagraun kampani i go bikpela na askim olgeta long wok bung wantaim,"

"Sapos i gat sampela bel hevi namel long yumi orait yumi sindaun wantaim na stretim long gutpela wei na long wok bung wantaim," Kumura i tok.

Jeneral Menesa bilong Ramu NiCo Kopret Afes, Charlie Hu i tok tenkyu bilong Ramu NiCo i go long ol lain husat i bin sindaun na paitim tok-tok long las 3-pela mun long mekim dispela kontrak i kamap we ol i sainim bai givim gutpela samting long ol pipol long narapela 3-pela kris-mas.

Em i tok i gat planti benefit insait long dispela kontrak na i laikim bai RSSL i wok hat long lukautim sefti bilong Ramu NiCo na ol wok lain bilong em bikos dispela kain wok bung tasol bai i kamapim moa benefit i kam long ol papagraun.

RSSL Jeneral Menesa, Denguo tok em i gat bikpela driman long mekim kamap RSSL i wanpela bikpela sekyuriti kampani insait long Madang na PNG na bai i gat moa bisnis na benefit bilong ol papagraun bihain long Ramu NiCo i pinisim projek bilong em.



Ol eskot tim bilong Raibus Security we i save kamapim wok sekyuriti long Ramu NiCo na ol narapela kampani long Madang.



Ol gad bilong Raibus Security we i mekim wok sekyuriti long Madang Airport.




Wanpela gad bilong Raibus Security wantaim gad dok



Presiden bilong Ramu NiCo, Gao Yongxue na Jeneral Menesa bilong Raibus Security Services Ltd, Mathew Denguo i sikan bihain long sainim sekyuriti kontrak



Presiden bilong Ramu NiCo, Gao Yongxue na Jeneral Menesa bilong Raibus Security Services Ltd, Mathew Denguo i redi long sainim sekyuriti kontrak.





# George Burgess i skelim tingting

South Sydney prop, George Burgess i luk olsem bai i lusim Redfern na ol arapela brata bilong em.

Bipo long sisen i bin stat, em i bin tok nogat long ol Parramatta husat i bin laik givim em 3 yia kontrak. Em i bin tok em i no laik pilai ragbi long narapela NRL klap. Tasol long Trinde em i tok em bai skelim tingting long muv i go long narapela klap.

"I gutpela long pilai wantaim ol brata bilong mi (Sam na Tom) tasol mipela i gat narapela laip na em i taim bilong lusim

ol," dispela intenesenel pilaia bilong Ingran i tok.

Kosa bilong ol Rabbitohs bipo, Anthony Seibold i gat laik long kism Burgess i kam antap long Kwinslan, tasol Burgess i tok em i laik stap na pilai aninit long Wayne Bennett. Em i no tokaut stret sapos em bai muv i go long Broncos o nogat.

"Ating bai mi go. Ating nogat," em i tok.

"Mi no klia yet- mi no laik tingting planti long dispela.

"Nau mi tingting tasol long pilai na wanem samting i kamap bihain,

bai i narapela samting."

Burgess i tok tu olsem em i no tingting long ritaia yet. Em i laik pilai ragbi yet na bodi bilong em i fit yet.

"Bodi bilong mi i pilim orait. Mi gat 27 krismas na mi fit yet," em i tok. "Mi laikim tumas ragbi. Em i bikpela samting long laip bilong mi na mi save amamas long kamap long trening na bai mi mekim olsem inap longpela taim yet.

Em i tok em i amamas long pilai ragbi. Ol Souths i bin wari long taim wanpela pilaia bilong ol, hapbek Adam

Reynolds i bin kism bagarap long taim bilong trening.

Burgess i tokim Daily Telegraph niuspepa olsem Reynolds i bin "pulum wanpela samting."

Ol Rabbitohs i stap long namba tu ples na long Sarere nait, bai ol i salensim ol Canberra Raiders, husat i stap long namba foa ples long poin lata.

Burgess i ting dispela gem namel long tupela tim bai i wanpela strongpela gem. Ol lain i givim nem "Battle of Britain" pinis long dispela salens bilong ol Raiders na Rab-



South Sydney Sam Burgess wantaim ol brata bilong em George na Tom bihain long South Sydney v St. George Illawarra NRL semi Fainal long ANZ Stadium

bitohs bikos i gat planti ol pilaia bilong Ingran long tupela tim wantaim. "Ol

Raiders i strongpela tim na i gat ol gutpela pilaia olsem Josh Hodgson na


sampela arapela pilaia bilong Ingran," Burgess i tok.

# Brad Fittler i makim ol NSW Blues

Kosa bilong NSW, Brad Fittler i tokaut long nem bilong ol Blues pilaia long namba wan gem bilong 2019 State of Origin.

Ol dispela 17 pilaia i gat 5-pela nupela pilaia bilong Origin, na sampela sampela olpela pilaia husat i no bin smat tuams long dispela sisen. Hapbek Nathan Cleary i stap long tim maski sapos em i no bin pilai gut long dispela sisen.

Nick Cotric, Cody Walker, Jack Wighton,



Payne Haas, na Cameron Murray bai pilai namba wan taim long tim bilong ol Blues.

Fittler i tok Cody Walker i wanpela gutpela pilaia na em i fit olsem

na nau em i sans bilong em long pilai long kain bikpela gem olsem.

Em i tokim Nathan Cleary olsem sapos em i pilai gut long Bankwest Stadium bai ol i kism em gen na em i bin man-of-the-match na helpim ol Panthers long winim dispela gem.

Fittler i tok NSW i laikim ol kain pilaia olsem Cleary.

"Payne Haas tu i wanpela top pilaia. Ol lain i lusim ting olsem las yia, name long sisen, em i bin brukim wisket bilong

em, tasol em i kam bek nau na i wok long pilai gut.

"Em i wanpela top yangpela fran-rowa nau na ol birua tim i save painim taim long bringim em i go daun, na ating ol Kwinslan tu bai painim wankain hevi," Fittler i tok.

Blues skat bai go stap long kemp bilong ol long Coogee inap wan wik na bihain bai ol i flai i go long Brisbane.

Bai Origin i kamap long Suncorp Stadium long Jun 5.

## NSW BLUES SQUAD

### NSW BLUES SQUAD

- 1 James Tedesco
- 2 Josh Addo-Carr
- 3 Latrell Mitchell
- 4 Josh Morris
- 5 Nick Cotric
- 6 Cody Walker
- 7 Nathan Cleary
- 8 David Klemmer
- 9 Damien Cook
- 10 Paul Vaughan
- 11 Boyd Cordner
- 12 Tyson Frizell
- 13 Jake Trbojevic
- 14 Jack Wighton
- 15 Payne Haas
- 16 Cameron Murray
- 17 Angus Crichton



# Walters i sapatim ol yangpela Maroons

Kosa bilong Kwinslan, Kevin Walters i tokaut olsem ol yangpela Maroons tim bilong em bai mekim save stret long ol Blues long namba wan State of Origin gem.

Em i sapatim stand-in huk, Ben Hunt husat bai lukautim No.9 posisen na Kalyon Ponga long laitim paia long fil. Walters i apim nem bilong ol pilaia bilong em long taim em i tokaut long nem bilong ol long Mande.

Bihain long ol Blues i bin lus las yia, Walters i mekim bikpela senis long tim na i putim tripela nupela pilaia long werim jesi bilong ol Maroons long dispela gem long Suncorp Stadium long Jun 5.

"Mipela i redi. Dispela em i woa," Walters tokim ol nius ripota.



Kwinslan, i redi gut long go insait long dispela gem. Mipela i pilai long asples na bai mipela i pilai gut tru na amamasim ol lain i save sapatim mipela. Ol pilaia, ol sapatina ol sponsa tu," Walters i tok.

Ai wara i stap long ai bilong Walters long taim em i mekim dispela tok long taim bilong em.

"Mipela i bilip bai mipela i winim dispela gem. Mipela i makim wanpela

em long werim dispela jesi bilong Kwinslan. Las yia em i bin pilai long posisen bilong hapbek na yutiliti.

Long taim ol ripota i askim sapos Hunt inap pilai gut long dispela nupela posisen, Walters i sapatim dispela nupela damihap bilong em.

Daly Cherry-Evans bai pilai long posisen bilong hapbek. Em i no bin pilai inap 5-pela wik bihain long em i bin kism bagarap long lek bilong em.

Fowad bilong ol Titans, Jai Arrow na fulbek bilong ol West Tigers, Moses Mbye i bin kism bagarap na bai no inap pilai long raun 11, tasol Walters i tok em i no ting dispela bai stopim ol wok redi bilong em.

Em i tok olgeta pilaia bilong em bai i stap long trening long dispela wik.

# Haas i tanim bel na stretim laip bilong em

Long taim NSW State of Origin pilaia, Payne Haas, i lukim nem bilong em i kamap long nius bikos long ol asua bilong em, dispela pilaia i luksave olsem em i mas senisim laip bilong em hariap.

Em i gat 19 krismas na i gat sans long kamap wanpela top NRL pilaia, tasol em i lukim olsem laip bilong em i wok long bagarap nau.

Dispela bikpela Brisbane pilaia - longpela bilong em inap long 194cm na hevi bilong em inap long mak bilong 119kg, i bin kism bikpela hevi long mun Februari. Ol i bin sasim em na em i baim \$20,000 fain, bikos em i no bin bihainim tok bilong wanpela wok painim bilong NRL integriti yunit investigesen.

Em i tok long taim dispela hevi i kamap em i bin tingting planti, bikos em i gat ol liklik brata na susa na em i no laik nem bilong em i bagarap long ai bilong ol. Neks wik

Trinde bai i namba wan taim tru long em i pilai long wanpela State of Origin gem.

Haas i tok em i pasim tingting long dispela taim olsem bai em i no inap larim dispela asua i bagarapim laip bilong em. Na bihain long em i toktok na kism tingting bilong papamama, em i tanim bel na kamap wanpela Islam.

Bihain long dispela taim, laip bilong em i senis na i wok long kamap gut nau.

Em i go bek pilai gen long raun faiv, na i soim olsem em i wanpela top prop long NRL kompetisen na bihain long 10-pela gem, nem bilong em i stap long pilai long tim bilong NSW.

Long taim ol Blues i stap long trening kemp bilong ol na redi long namba wan gem, bai em i bihainim lotu bilong ol Islam na tambu long kaikai na dring namel long taim san i kamap na san i go daun, bikos

nau em holi mun bilong Ramadan.

Bai em i tambu long dring wara long taim ol i trening strong long fil na insait long jimnesium tu.

"Dispela pasin bai strongim tingting bilong yu," Haas i tok.

"Dispela i bikpela samting long mi. Islam i bikpela samting long laip bilong mi na Ramadan i bungim olgeta. Dispela mun i blesing bilong mi.

Em i tok i gat ol gutpela lain i stap baksait long em. Bipo laip bilong em i bin drip nating tasol nau Islam i senisim laip bilong em na bringim em i kam bek long stretpela rot.

Haas em i wanpela bilong ol nupela pes long tim bilong ol Blues long namba wan gem bilong Origin. Kosa, Brad Fittler i apim nem bilong em na tok olsem em i wanpela top prop na wanpela yangpela ruki.

"Bai mi stap isi na skelim ol samting long laip bilong mi," Haas i tok.

# Walters i makim ol Maroons

Kosa bilong Kwinslan, Kevin Walters bai putim ol nupela pilaia olsem Joe Ofahengaue, Moses Mbye na David Fifita long nupela stail Maroons tim bilong 2019.

Fifita i gat 19 krismas na em i namba tu yut long stap insait long dispela Origin seris long Suncorp Stadium long Jun 5. Payne Haas husat i gat 19 krismas tu bai pilai long tim bilong ol Blues.

Coen Hess, Jarrod Wallace na Gavin Cooper bai i no inap pilai.

Walters i makim fulbek bilong Wests Tigers, Moses Mbye long posisen bilong yutiliti.

Tim Glasby em i namba 18 na Anthony Milford em i namba 19 pilaia long tim.

Walters i kism Kurt Capewell bilong Cronulla long stap olsem devel-opmen pilaia na em tok



bai em i givim nem bilong namba 21 pilaia long dispela wik.

Daly Cherry-Evans i luk olsem bai kism wok bilong kepten.

Hia em nem bilong ol Maroons pilaia:

- 1 Kalyon Ponga
- 2 Corey Oates
- 3 Michael Morgan
- 4 Will Chambers
- 5 Dane Gagai

- 6 Cameron Munster
- 7 Daly Cherry-Evans
- 8 Jai Arrow
- 9 Ben Hunt
- 10 Josh Papalii
- 11 Felise Kaufusi
- 12 Matt Gillett
- 13 Josh McGuire
- Interchange
- 14 Moses Mbye
- 15 Joe Ofahengaue
- 16 Dylan Napa
- 17 David Fifita
- 18 Tim Glasby



# NSL kosa askim PNGFA long intenesenel frenli gem

James G. Kila i raitim

PNG FUTBAL Asosesin i mas wok hat long kamapim moa intenesenel frenli gem wantaim ol arapela kantr insait long Osenia Konfederesen long redi gut long Pasifik Gems long Samoa long Julai.

Amos Romo, wanpela PNG intenesenel midfilda bipo na kosa bilong Kagua-Erave Futbal Klap insait long Kumul Petroleum Nesenel Soka Lig i mekim dispela toktok.

Romo i tok amamas long PNGFA Teknikol Menesa, Paul Isorua long tokaut olsem PNG Kapuls bai pilai wantaim Nu Kaledonia long wik antap long Mosbi olsem frenli gem. Ol bai pilai tupela frenli gem

long Jun 7 na Jun 9. Tasol, Romo i tok olsem PNG Kapul i nidim moa frenli gem wantaim ol tim long Osenia Futbal Konfederesen long luksave long strong bilong. Em i tok ol pilai i ken kisim moa ekspirien long pilai olsem tim na ridim gem bilong. Dispela bai kamapim moa gutpela kombinesen o save long ol yet na stail bilong wan wan pilai.

Em i tok bipo taim PNG i save gat planti gem egensim ol tim bilong Saut Pasifik rijon olsem Solomon Ailan, Vanuatu na Fiji. PNG i save gat gem tu wantaim ol lain brata long Wes Papua na tu Nu Silan. Tasol nau long dispela taim kain ol intenesenel frenli gem i no save kamap.

Romo i tok tenkyu long PNGFA long redim dispela frenli gem wantaim Nu Kaledonia.

Romo i tok amamas long kosa bilong PNG Kapuls, Bob Morris, husat i wanpela kosa bilong Madang yet na man husat i gat moa ekspirien long soka na i ken redim gut tim pastaim long Pasifik Gems long Samoa.

Em i tok olsem dispela tupela gem bai givim gutpela sans long Morris i ken redim tim gut na tu luksave long fitnes na stail bilong gem em wan wan pilai i ken soim na helpim PNG Kapuls taim ol i pilai egensim ol brata tim bilong wansolwara long Pasifik. Insait long midia ripot Morris

ris i tokaut olsem PNG Kapuls i gat wanpela gutpela sait em planti ol pilai i bin kamaut long OFC Nesens Kap skwat wantaim sampela ol yangpela pilai tu.

Morris i bin tok olsem Kapul bai gat gutpela tim lain-ap bilong en wantaim Auckland City straika David Browne na narapela pawa straika tu em Tommy Semmy na tu ol gutpela fowat bilong Toti City em kepten na straika Raymond Gunemba na Nigel Dabinyaba.

Em i tokaut tu olsem tupela brata Alwin na Felix Komolung bilong Madang husat nau i stap ovasis bai joinim Kapuls long gem long neks wiken.



## Bikpela wari kamap long Raun 3 Endurens Salens

I gat sampela lain i lukim olsem sampela wari i bin kamap insait long NRL long las wiken. Yes, ating dispela ol i mas lukim pinis. I gat sampela lain i lukim wanpela wari long win insait long Australian ileksen long wan wiki go pinis? Yes, dispela i gat liklik luksave tu.

Nau long Pot Mosbi Rot Rana gat wankain pasin i bin kamap long Sande moning insait long raun 3 bilong Endurens Salens long Yunivesiti 11.2 kilomita resisbung long Waigani.

Skene Kiage i no bin win. Dispela i namba 2 taim i bin kamap insait long tupela yia, na namba wan taim long bikpela resisbung. Birua bilong em i no narapela, Stanley John tasol husat i bin stap wantaim strong bihain long Skene husat i stap namba wan planti taim.

Stanley i bin strong moa yet long Skene long taim bilong resis i stat. Em i bin stap klostu wantaim long fran long em taim ol i pinisim wanpela lep long tupela 5.6 kilomita lep resis we Stanley stap strong moa yet. Ran go insait long Fot Bana Bum-get long taim bilong namba 2 lep wantaim 2 kilomita i stap yet Stanley i kamapim strongpela ran long abrusim Skene husat i stap 10 mita bihain long em. Stanley i pairapim strong moa long ran bilong em long winim resis insait long 44 minit na 10 seken long Skene husat i kam bihain insait long 44 minit na 29 seken, 9 seken tasol i abrus wantaim narapela strongpela rana Will Robinson namba 3 insait long 45 minit na 11 seken.

Falyn Buda i bin kamapim strongpela ran long winim resis namel long ol meri insait long 67 minit na 11 seken. Em i wanpela junia rana husat i save mekim strongpela ran ol taim. Annette Bora i bin kamap namba 2 insait long 67 minit na 14 seken long Heidee Paiva namba 3 insait long 74 minit na 22 seken husat i mekim gutpela ran. Sampela meri bihain long ol em Jerrin Paul (75.15), Nellie Jack (84.24), Priscilla Aitsi na Glenda Yuwi tupela wankain (90.23).

Swans Pinampio i bin mekim gutpela luksave long ol sevis rana (50 i go 59 yia) wantaim strongpela ran long kamap namba 4 insait long 49 seken na 36 seken long Terry Fisher husat i bin ran olsem longlong man husat i bin mekim luksave namel long sevis rana (60 i go 69 yia) resis insait long 69 minit na 57 seken. Namba 4 raund long dispela Salens bai kamap long Jun 23, 2019 long Taurama Ten Maila (16-kilomita) resis bai sta long Pot Mosbi Grama Skul. Dispela bai i bihainim Ela Hap Maraton (21.1 km), dispela bai namba faiv na fainel resis bilong dispela yia salens.

Long narapela Sarere long 5 klok apinun ol Rot Rana bai gung wantaim long Mobail Sevis Stesin, klostu long Stop N Shop, Gerehu long Rainbow. Dispela distens em; 2, 4.3 na 8.6-km. Nupela ranas i welkam long joinim grup. Olgeta i mas kamap wantaim gutpela tingting na 20 toea sapos yu ken kisim kam.

## REL givim helpim long Madang Knights ragbi lig klab

James Kila i raitim

KNIGHTS Ragbi Lig klap husat save pilai long Madang Ragbi Lig kompetisen long las wik Trinde, Me 22 i bin amamas long kisim helpim long wanpela lokal kampani long rejista long ol pilai bilong en.

Jeneral Menesa bilong Raibus Ensinaring Limited (REL), Brodney Seip i givim K2,000 long Knights klap menesa, Albert Tobe.

REL em wanpela lokal papagraun kampani bilong Ramu nikel/kobalt projek.

Mista Seip i tok lenona kampani menesmen aninit long lukaut bilong em i amamas long sponsa ol Knights ragbi lig klap long helpim ol yut na spot long Madang komyuniti.

Em i tok REL i bin givim helpim ol spot tim ol sios, yut na program bilong ol wimen bihain long em i bin kamapim

wok olsem wanpela Lanco long yia 2008.

Mista Tobe i tok tenkyu long REL long sapotim spots na luksave kampani i givim long Knight RLC.

Em i tok ol bai yusim dispela mani long rejista ol 60 yut o yangela manmeri husat i save pilai ragbi lig wantaim Knights RLC.

Em i tok dispela sponsa bai go long baim registresen bilong 40 man na 20 meri insait long klap long dispela yia. Planti long ol dispela lain em ol i no wok na spot i save mekim ol i stap pilai na lus tingting long kamapim bikhet pasin insait long komyuniti.

Tobe i tokaut tu olsem Madang RFL sisen i bin stat long las wiken antap na Knights i redi long ron i go insait long fil.

Knights i gat tupela tim bilong man na wanpela tim bilong ol meri long Madang RL kompetisen.



Jeneral Menesa bilong REL, Brodney Seip i givim K2000 long Menesa bilong Knights RLC klap menesa, Albert Tobe long Madang.

## Bintangor Goroka Lahanis autim Agmark Rabaul Guria

Sape Meta i raitim

Long las 7-pela raun long taim Digicel Kap pilai i kamap long dispela sisen, Agmark Rabaul Guria i no bin lus long wanpela gem.

Tasol i kam long raun 8 long Sande long taim dispela ol bois bilong Is Nu Briten i kamap long Goroka long resis wantaim ol sempion tim bilong 2018. Bintangor Goroka Lahanis, narapela stori olgeta i bin kamap.

Sempion tim, bilong Goroka na PNG i bin redi gut tru na wetim Guria long kamap na wanem samting ol pilai bilong Isten Hailans i redim, ol i bin givim stret long ol. "Mipela i save olsem Rabaul Gurias bai i kamap na givim mipela gutpela ran long hom graun bilong mipela long Goroka. "Long dispela as mipela i



Goroka Lahanis pilai traim banis bilong tupela Rabaul Gurias pilai long las Sande long Isten Hailans provins. (Foto Sape Meta)

bin redi gut tru long bungim ol", tim menesa Tom Pori i tok.

Em i tok Lahanis i no winim taitel bilong 2018 long disipe-

la rot. "Olsem na long olgeta gem bilong mipela, em bai olsem ol gren fainol pilai tasol.

"Lond dispela tingting, mipela i bin kamapim gutpela

gem bilong ranim bal na atek. Na dispela i mekim ol i bin winim Gurias wantaim gutpela skoa 28 - 14 long raun eit bilong Digicel Kap", Pori i tok.

## Sisters kisim namba 6 taitel

Nicky Bernard i raitim

SISTERS Sofbal Klap i winim bek taitel bilong ol bilong dispela yia long Pot Mosbi Sofbal Asosiesen long wiken.

Sisters i daun ol Saints long gren fainal pilai bilong ol meri A gret long Bisini Sofbal graun long Mosbi. Sisters i gat olgeta pilai bilong ol i stap wantaim ol na dispela i lukim ol i gat planti ekspirien long piail long fainal.

Ol meri Saints em namba wan taim bilong ol long go insait long gren fainal bihain long ol winim ol Bears long semi fainal.

Yangpela pitsa bilong Saints i givim planti gutpela bal long ol beta bilong Sis-

ters na dispela i mekim ol Sisters i kisim planti hom ran long bring skoa bilong ol i go antap.

Saints i painim hat long ketsim skoa bilong ol Sisters long wanem sevis pitsa bilong ol Sisters i tromoi bal strong tru long mekim ol bita bilong Saints i painim hat long paitim bal bilong em.

Sisters nau i kamap kwin bilong Pot Mosbi Sofbal Asosiesen long namba 5 taim olgeta, maski dispela yia sisen i sotpela, planti long ol tim i amamas long pilai long dispela sisen.

Long resis long B gret meri Gazelle i winim ol yangpela meri bilong Yokomo long kamap kwin bilong B gret bilong 2019 sisen.



# Isou win wantaim sans trai

**Jacklyn Kimala i raitim**

GALP Isou i bin winim NCDC POM Vipers long raun eit bilong Digicel Kap las wik Sande long Nesenel Futbol Stadium.

Long namba wan hap bilong gem, Isou i soim olsem ol misim senta bilong ol Smith Siviri, long wanem em i bin joinim Hunters skwat olsem na senta bilong Vipers i bin putim namba wan trai wantaim gutpela kik na bringim skoa 6-0.

Insait long 30 minits bilong namba wan hap, Isou i bin givim narapela penalti gen long Vipers klostu long 10 mita lain bilong Isou na Vipers kisim penalti gol.

Long wankain taim ausait senta bilong Isou Wannah Minne i kisim

bal na katim namel bilong ol Vipers pilaia na skoim senta trai stret. Faiv eit bilong ol, Yunny Patrick i bin kikum gutpela kik na skoa i go antap long 6-8.

Fulbek bilong Isou, Josh Erico i bin skoim wanpela gutpela trai bihain long em i bin brukim banis bilong tripela winga bilong Vipers na putim trai tasol kik i abrus na hap taim skoa 12-8.

Kepten bilong Vipers, Larsen Marabe i bin kamapim bagarap insait long fil na refri salim em long sin-bin tasol Marabe i les long go ausait long fil na dispela i bin kisim taim bilong tupela tim. Bihain Marabe i wanbel na wokabaut isi go ausait long fil na gem i stat.

Dispela i bin mekim Vipers isi long

pilai, tasol hap bek bilong ol Karis Yoba Peter i bin bekim senta trai bilong ausait senta bilong Isou wantaim gutpela kik na balensim poin 14-14.

Klostu tupela tim wantaim i dro inap seken kaun daun na Rex Hapeo, hap bek bilong Isou i ran wantaim bal long kona na kikum go na putim win trai. Kik i gutpela na i bringim skoa 20-14.

Gem bilong tupela hom tim wantaim i bin gutpela tasol i gat liklik bagarap insait long fil wantaim ol pilaia yet tasol ol i bin wanbel na pilai.

Tupela wantaim i soim strong bilong tupela na i pilai strong long winim raun eit bilong Digicel Kap, tasol Vipers i bin asua liklik na Isou i winim ol 20-14.



Wanpela POM Vipers pilaia holim bal na traim difens bilong Galp Isou long raun 8 bilong Digicel Kap long las wik Sande long Pot Mosbi. (Foto Jacklyn Kimala)

## Hunters givim tupela gol long Magpies

**Jacklyn Kimala i raitim**

PNG SP Hunters i bin givim tupela gol long South Logan Magpies long raun 11 bilong Intras Supa Kap long Pot Mosbi.

Dispela gem namel long Hunters na Magpies i bin kamap gut na mekim ai bilong ol sapota i amamas long lukim na sapot wantaim. Bikos insait long tim i bin gat tupela nupe-la pilaia, fulbek Terry Wapi na dami Silas Gahuna. Tupela i bin mekim bikipela senis long namba wan hom gem bilong Hunters.

Long namba wan hap Hunters i bin kisim sin-bin na senta Brendon Gotuno i bin go ausait long fil na Gahuna na Hasu i wok strong long kisim ansa i kam long Gairo Kapana husat i bin ranin namba wan trai bilong Hunters insait long 11 minit bilong namba wan hap bilong gem.

Man-ov mets Wapi i bin hetim nem bilong em long skoa bod insait long 18 minit taim em i bin saitim difens bilong Magpies fowat Brendon Gibb na Shaun Fenson na putim senta trai. Dispela trai em bilong Silas Gahuna bihain long em i bin brukim difens long 40 mita lain bilong Magpies.

Na narapela trai gen i kam long Terry Wapi, tasol kik i abrus na namba 11 bilong Magpies skoaim gutpela trai na kikum gutpela kik na bekim trai bilong balensim skoa bilong ol 10-10.

Hunters putim tupela trai long gutpela kik bilong faiv eit Justin Yoka tasol wanpela kik abrus na narapela go insait na bringim skoa i go long 20-10.

Long wankain taim, Magpies i bekim wantaim wanpela trai na gutpela kik i bringim skoa 20-16 na

narapela gen i bringim skoa 22-22.

Tupela tim inap long dro, tasol Magpies i bin asua taim Terry Wapi kisim ranawe trai na ol i holim em taim Wapi i pasim bal pinis long Jerry Teme.

Dispela i bin givim win long Hunters wantaim penalti gol na i bringim skoa i go long 24-22.

Dispela em skoa bilong olgeta tim resis long Raun 11 Intras Supa Kap-long Sarere 25 Me, 2019;

Northern Pride 14 na Tweed Heads Seagulls 30, Townsville Black Hawks 30 na East Tigers 8, Burleigh Bears 34 na CQ Capras 12, Ipswich Jets 8 na Sunshine Coast Falcons 62, Mackay Cutters 16 na Redcliffe Dolphins 12. Na long Sande 26 Me, 2019: North Devils 24 na Wynnum Manly Seagulls 34, PNG Hunters 24 na South Logan Magpies 22.

## Hunters bai kamap gutpela-Marum tok

**Jacklyn Kimala i raitim**

NUPELA senis insait long Hunters i bin mekim bikipela amamas win bilong raun 11 Intras Supa Kap las wik Sande long Pot Mosbi.

Dispela em i namba wan hom gem win bilong Hunters taim tupela top pilaia Wapi na Silas i bin joinim tim wantaim welkam poin 24-22.

SP Hunters i lus 10-pela raun olgeta inap long raun 11 na Hunters kamap wantaim strongpela gem na winim ol Magpies.

Kosa bilong SP Hunters Michael Marum i tok i gutpela long lukim

Terry Wapi husat i pilai fulbek long namba wan taim pilai gut stret long strongim posisen bilong em, tasol i gat sampela hap em bai mas wok moa long strongim.

Marum i tok dispela em namba wan gem bilong Wapi long Intras Supa Kap, na em bai kamap gutpela yet long narapela raun.

Em i tok long hap posisen em bai ol lukim long taim bilong trening long Tunde apinun na mekim senis tasol Justin Yoka i bin kam gut long ol faiv las kik.

"Bihain long ol go i daun na resis wantaim Redcliffe Dolphins long

raun 12 bilong Intras Supa Kap long Fraide, em bai traim lukim sampe-la video long mekim senis," Marum tok.

Em i tok kepten Moses Meninga i bin orait long las 70 minit bilong gem olsem lida bilong tim na em i bin pilai gut.

Marum i amamas long olgeta fowat bilong em olsem Dilbert Isaac, McKenzie Yei na Silas Gahuna tu i bin kam insait long joinim tim. Olgeta i bin pilai gut wantaim strongpela difens tasol bai em i lukim long trening sisen bihain long narapela ol raun bilong gem.



Ian James bilong Jiwaka nau i pilaia senta bilong Royals long Pot Mosbi Ragbi Lig (PRL) kompetisen. (Foto Jacklyn Kimala)

## Spot profail bilong Ian James

**Jacklyn Kimala i raitim**

IAN JAMES em i bilong Jiwaka provins, em i gat 21 krismas na em i skul long Intenesenel Trening Institut, (ITI) long Pot Mosbi.

Taim em i stap long praimer skul na em i gat 17 krimas, ol i bin makim em long go pilai ragbi lig long Lae Zones Sempionsip.

Long las yia 2018 em i bin pinisim gret 12 na kam stadi long ITI long Pot Mosbi. Em i stap wantaim papamama bilong em long Gordons.

Long dispela yia lan i bin askim ol Royals bikos em stap klostu long Gordons Polis Bareks na inap long trening wantaim ol. Em i bin joinim tim na pilai wantaim ol long PRL kompetisen.

Ian i tok ol Royals i bin lus faivpela taim tasol long namba sikis raun bilong ol, em i bin joinim tim na em i putim wanpela win trai.

Long raun seven bilong PRL lig komeptisen, tim bilong em i bin win na long raun eit ol i bin lus tasol long raun 9 bilong PRL em i bin skoim wanpela win trai bilong Royals na winim ol Kone Tigers.

Ian i tok insait long ol NRL tim, wanpela pilaia em i save laikim stret na traim long bihainim gem stail bilong em, i Greg Inglis. Em i save sapotim ol Maroons tim bikos Greg Inglis i pilai wantaim ol.

Em i tok planti gem bilong em i save traim long bihainim stail bilong Greg Inglis taim em i ran insait long fil.

"Bikipela tingting bilong mi long kamap namba wan pilaia bilong ol lokal

tim, na go insait long intasiti level na go yet long Hunters, Kumul na makim PNG."

Ian i tok slip kirap wantaim ragi lig na raun wantaim stail bilong Greg Inglis tasol em bai traim long kamap wantaim NRL pilaia long bihain taim.

Em i tok sapos God laikim em long makim kantri na pilai, em bai em go het long ragbi laip tasol sapos God i laikim em long stap long PNG yet na pilai long lokal tim bilong em yet, dispela tu em orait long tingting bilong em.

Em i tok taim em i save lukim ol Hunters na ol Kumul i save pilai, tingting bilong em i save stap insait long fil na em i save tok, i gat taim bai em kamap wankain olsem ol.

Dispela em bikipela driman bilong Ian long kamap namba wan pilaia bilong kantri na provins na famili wantaim.

Ian i tok bikipela tenkyu long husat ol lain i bin helpim em long bringim em kamap antap long sait bilong ragbi.

Spesel tenkyu bilong em i go long het masta bilong em long Bans Praimeri skul na long haikul spot kodineta tisa bilong em Vivian Hambas na fainel wan long David Moifa husat i save strongim spot na sapotim ol long pilai strong.

Bikipela amamas bilong em long papa bilong em husat i save sanap baksait long em taim em i laik go pilai ausait long provins o insait long provins, na tu long famili husat i save sapotim em na singaut taim em i ran insait long fil.



Fowat na kepten bilong Hunters Mosses Meninga holim bal bihain long ol fowat bilong Magpies putim em go daun long graun. (Foto Jacklyn Kimala)





Ol poto: Nicky Bernard



Ol manmeri husat i stap baksait long dispela spot awod bilong dispela yia 2019.

SP Sports Awards bilong 2019 i bin kamap long las wik Sarere long Pot Mosbi. Planti bilong ol spot manmeri i bin go kamap long dispela bung. Moa long 40 manmeri i bin go insait long fainal bilong Spot Awod.




**SPOT POTO**  
Simon Keslep



**SPOT MIDIA BILONG YIA**  
Jack Ami



**PEOPLE CHOICE AWARD**  
Maleos Mix Netball Tim



**SPOT OPISOL BILONG YIA**  
Rarua Dikana



**BEST SPORT PERSON WANTAIM DISABILITI** - Steven Abraham



**JUNIA MERI ATHLETE**  
Violet Apisah



**JUNIA MAN ATHLETE**  
Geoffrey Loi



**COMYUNITI SPORT INITIATIVE**  
Backyard Sports



**NATIONAL PERFORMANCE**  
Alotau Under 15 Netball Team



**TEAM BILONG YIA**  
Barramundis Men's Cricket Team



**FEMALE ATHLETE**  
Dika Toua



**MALE ATHLETE**  
Steven Kari



## Wapi, Silas kamap sta long daunim Magpies

**Jacklyn Kimala i raitim**

SP Hunters i bin kisim namba wan hom gem win bilong ol taim tupela nupela top pilaia Terry Wapi na Gahuna Silas i bin joinim tim long resis wantaim ol South Logan Magpies long las Sande long Nesenel Futbol Stedium long Pot Mosbi.

Terry Wapi i bin mekim namba tu hom gem win bilong ol Hunters bihain long em i kamap Hunters No.82 long pilai wantaim Hunters long raun 11 bilong Intras Supa Kap.

Gahuna Silas i bin kam bek long tim na mekim bikipela senis taim em i pilai insait long fil. Tasol Wapi i bin abrusim ol arapela pilaia na kisim namba wan pilaia bilong raun 11 Intras Supa Kap resis.

Dispela nupela senis bilong Hunters skwat i bin mekim bikipela amamas bilong Hunters long winim namba wan hom gem 24-22.

Kosa bilong Hunters Michael Marum i tok stat long nau raun 11 win bilong ol bai mekim ol i kamap moa gutpela long ol narapela raun bilong Intras Supa Kap.



Taim yu senisim nepi bilong bebi bilong yu  
**Senisim long Sensi**

*Good Products, Better Prices, ikam long*

**Johnstons Pharmacies Ltd**

P.O.Box 1066, Boroko, Papua New Guinea.

Tel +675 325 3185 Fax +675 325 0190 Email [sales@johnstons.com.pg](mailto:sales@johnstons.com.pg)